

國

朝

文

匯

國朝文匯乙集目錄

卷五十八

程同文

號春廬浙江桐鄉人嘉慶己未進士官奉天府丞有密爾文集

范蠡論

方長青山靜居詩集序

送張子白還鎮番序

徐直生艾陵春泛圖記

吳德旋

字仲倫江蘇宜興人諸生著有初月樓集

學校貢舉論

與族弟筠墅書

張楊園先生傳

路慕堂先生家傳

張阜文先生述

惲子居先生行狀

盧

浙

號容庵江西武甯人嘉慶己未進士官太常寺卿

黎珠湄味道編序

十一

送博羅李明府去任詩序

十一

許謝氏傳

十二

文學方載軒先生墓誌銘

十二

許宗彥

字周生浙江德清人嘉慶己未進士官兵部主事有鑑止水齋集

禮論上

十四

禮論中

十四

禮論下

十五

悔菴文鈔序

十五

書殉難備致後

十六

汀州王文成公祠記

十六

福州陳氏祭酒嶺墓表

十六

國朝文匯乙集卷五十八

范蠡論

程同文

昔范蠡事句踐。用敗衄之越。以滅吳。句踐以霸。於是蠡曰。越王忍人也。遂亡去。其後句踐殺文種。蠡竟免。世之人無以測之。或以謂蠡知道者。嗟乎。蠡所操者術耳。烏足以知道。如以道則身固可以無去。而亦不殺彼文種者。蠡殺之者也。方句踐之棲會稽也。蓋將焚其妻子。以決死於吳者。屢矣。使如蠡者。因其激厲危苦之秋。進以仁義道德之說。以默銷其深詭之心。猜忮之性。凡所以愛其民。禮其士者。一出於誠。力齊足以戰。心一足以守。夫然後以制變於敵。彼吳之強。若飲狂樂然。舉重乘高。迅呼疾走。其力什倍於常人。然智者視之。知其不終朝而將顛仆以殞。蓋愈強而斃愈速。故當是時。吳雖無越。必自斃。然則越之所患。其不在於吳。亦審矣。計不出此。而一切導之以術。術者。實然藏於鬼神。不測之區。卒然而動。若鷙鳥之下擊。猛獸之決起。而莫知所自。及其斷也。雖加之於所甚愛之人。被以甚惡之名。而毅然不為之輟。故非天下之至忍。不能與於術也。且夫吳已滅矣。越以霸矣。是行術而既效也。夫行仁義道德而效。則亦樂於仁義道德矣。行術而效。則亦樂於術矣。蓋雖如蠡與種者。句踐亦必置諸術中。無怪也。一旦蠡去。而句踐懼矣。謂其知吾術也。夫蠡與種材相若。蠡知

國朝文匯

卷五十八

國學扶輪社印

吾術種蓋未有不知者也。彼知吾術而不去者。將奚為乎。此固句踐所日夕操刃而
覘於其側者也。吾故曰。種之殺。蠡殺之也。吾觀蠡之為人。豈遂能脫然於富貴哉。其
去也。畏句踐之術。而又自以其術免焉者也。夫誰則導句踐以術。乃至不能一日居
於其位。而幸而猶以術免。亦惑矣。傳曰。不以道事君者。其出乎。范蠡是也。商鞅用法
以強秦。而鞅以法死。范蠡用術以霸越。而蠡以術亡。彼後之干其君而不以仁義道
德為說者。亦可以鑒矣。

方長青山靜居詩集序

昔人謂杜子美詩無一字無來歷。杜嘗自云。讀書破萬卷。下筆如有神。而鍾仲偉詩
品則曰。吟咏性情。何貴用事。是二說者。孰為得歟。余年二十餘。始學為詩。嘗問詩法
於吾友方長青氏。於時東南言詩之士。相率為性靈之說。日趨於淫靡。佻薄。長青為
詩。獨根柢於古。不屑屑標舉性靈。而語益高妙。余因是而悟。竊以為詩品自一家之
言耳。非詩之正也。孔子曰。不學詩。無以言。又曰。言之無文。行之不遠。蓋詩必以造語
為工。而造語必以用事為妙。今試取三百篇讀之。沔彼流水。朝宗於海。用禹貢也。燎
之方揚。甯或滅之。用盤庚也。國雖靡山。或聖或否。民雖靡盬。或哲或謀。或肅或艾。用
洪範也。罔敷求先王。克共明刑。用康誥也。虞史臣之序曰。帝釐下土方。商頌用之。夏

集

送張子白還鎮番序

鎮番東西北皆倚邊。邊城環之如半規。然以俯臨於邊外。邊外之地。惟鎮番形勢足以控之。康熙中。噶爾丹強盛。套西額魯特為所破。其長上書求內附。詔許之。畀以牧地。置之甯夏賀蘭山以西。土人謂曰阿拉善王。阿拉善者。蒙古語賀蘭山也。雍正中。始即鎮番改衛為縣。而屬以甘涼肅邊外地。東至於沙河。西至額濟納河。其廣二千餘里。皆北界於額魯特。蓋以一縣而蔽河西三府州之背。其寄為最重。土曠而不治。則莫急於井渠之利。民饑而不文。則宜講於庠塾之教。耕牧相錯。或慮其爭。亭障晏然。亦戒其弛。非其令之具幹濟有恩與感者。未見其效也。其治為最難。夫寄之也重。而治之也難。則意非其人莫屬也。然而鎮番之令。則由乎部選。常以資格而得之。非視夫大縣之必調而任也。故任鎮番者。苟材與智。則且旦夕謀所以去之。而大吏者。苟有見於其材與智。亦必謀所以轉諸善地。以為此不足以辱吾賢也。俗貧而人物之聚不饒。地瘠而賦歛之入益寡。其遂不得與大縣比。亦其勢然也。嗟乎。自為政者而惟地之擇。而事之重且難者之廢而不理也久矣。張君子白知鎮番既至。則曰。是豈不足為政乎。於是墜者舉之。仆者植之。期年。其民大和。君曰。未也。乃以時導民。審徑遂。表封界。常乘橐駝行邊。連旬日不返。手畫而口示。蓋種柳掘壕。以萬計。而民

益歡君嘗語所親曰使復數年俾壕盡成而柳盡活數世之利也總督惠公齡聞君賢一日語君曰吾將借君以皋蘭君曰蓋姬有受人之嬰而為之乳者及其未食也則不忍以去然則某誠不以皋蘭易鎮番嗟乎此足以見君矣嘉慶甲子十二月君以卓異徵入見其明年二月乃還君故善歌詩知君者咸為詩以道其行而屬余以序余既偉君之政而尤賢其眷眷於鎮番也是不可以無述

徐直生艾陵春泛圖記

艾陵春泛圖者職方徐君直生有懷舊隱之所為作也君家揚州北郭外三十里濱運河當江淮之衝而其旁有湖豁然數百頃所謂艾陵者也洲渚層複遠山縹緲春水方生沖融瀟灑浩乎無際帆檣沙鳥出沒於水光天影之中晦明朝夕千色萬態足以供騷人逸士之所流連而嘯傲宜君之處而樂出而不能已於思而寄諸圖畫也一日君置酒寓齋出此卷示客且曰吾嘗慕唐之張志和陸龜蒙宋之林逋其人皆嶢然高蹈自放於山閑水曠之外世莫能致以全其樂若艾陵湖者其佳處豈遜於三子者之所託哉吾既深愧夫三子者之高而亦不能不甚懷斯湖之美故凡圖中所以為舟為鶴為童為婢為書卷茶竈蓋以隱括夫三子者之事於尺幅中以志吾愧而已余以謂江湖之樂汗漫而不返澹泊而無營非似夫世之顯榮豪佚酣

蔡聲色之盛。為足以廢情而溺志。故朝市之士。輒視為枯槁寂寞而莫之顧。而其賢者。又或奮志於事功。眷懷於民物。雖顧此而有不暇。惟夫高明清曠之士。與狷介之流。而適無所用於時。而能終身乎此。而不去。則似造物者之於人。所甚靳而不予者。恒在此。而不在彼。然則彼慕夫三子者之樂。而不能致。而賦浩蕩以懷歸。感塵勞而太息者。獨君也哉。君與余同歲進士。而同寮。君屢材於其長。凡事之艱且鉅者。必君是倚。而余碌碌無所見。永定河之役。君勞甚著。既而南臨徐州。視決河。北按土默特。西出青海。再期之間。所行數萬里。皆有成績。余方浮沈而憔悴如故也。是則君之才。世且將羈縻之以盡其用。斯湖雖美。誠非君之所宜息駕。而余獨何為哉。蓋三子者之故跡。皆在余家一二百里之間。其山水舉父陵匹也。攬君之圖。可以悠然而思矣。

學校貢舉論

吳德旋

古者國有學。鄉有校。州有序。黨有庠。家有塾。民八歲入小學。教之以明父子之倫。長幼之序。灑掃應對進退之節。十五入大學。擇其才之可教者。聚之。不肖者復之。農畝其為士者。師教之以誠意正心修身齊家治國平天下之道。知仁聖義中和之德。孝友睦婣任卹之行。禮樂射御書數之藝。其所以養而成之者。詳且備矣。於是閭閻書其敬敏任卹者。族師書其孝友睦婣有學者。黨正書其德行道藝。州長考而勸之。三年大比。鄉大夫以賓興之禮舉之。而升之司徒。曰選士。升之學。曰俊士。司馬辨論其材。然後授之以官。而詔之以祿。其教之也備。故才易成。其核之也精。故舉不濫。其時上自公卿大夫。下至庶司百執事之人。莫不有孝弟忠信誠意廉潔之行。而鄉遂州黨之官。既以治民而為之長。及其教民也。而又為之師。故能民氣和樂。獄訟衰息。禮樂興而刑罰措也。嗚乎。何其盛哉。至於後世。鄉校州序黨庠閭塾。廢而不設。民多出於游惰。其號為士者。相與為記誦章句之末學。幾以干天子之爵祿。而古者大學教人之法。置而不講。郡縣中乃始建學立師。置弟子員數百人。而為之師者。又非必有德行道藝。可為師法。故弟子或終歲未嘗一見其師。而師亦未嘗一教其弟子。即有考課之法。定其優劣。又不過以繡繪雕琢之詞章。由是而舉於鄉。而貢於禮部。而策

名於吏部。率未嘗一考其德行道藝之何如。而逆委之以臨民之任。夫上之所期於士大夫者。莫不欲其有孝弟忠信慈惠廉潔之行也。而上之所以第而舉之者。徒以繡繪雕琢之詞章。則士之有孝弟忠信慈惠廉潔之行者。固無由以進之於上。而上之所舉。其有孝弟忠信慈惠廉潔之行者。蓋亦鮮矣。夫士以其記誦章句之末學。修之於家。而以其繡繪雕琢之詞章。獻之於天子之庭。不知於治天下之道。何所補也。然則鄉校州序黨庠閭塾之設。與六德六行六藝之教。與鄉舉里選之法。蓋可以不復乎哉。

與族弟鈞野書

鈞野弟足下。德旋前與吾弟及守靜耶溪書。狂言滿紙。諒諸君子必有以是正之。守靜寄到邱邦士文集。德旋四三細繹之。而心折焉。其修詞之潔。非同時諸家可比。又能飲鬱其氣於澠濤中。較之以風馳電掣。為駭人之狀者。誠不可以同日語。德旋嚮者於國初諸家文。有取乎汪堯峯。堯峯文醇雅可誦。而敘事傷於過煩。蓋自宋南渡後。諸文家通病。邦士乃亦間不免此病耳。然邦士文之佳者。絕出堯峯遠甚。故自明歸震川後。我朝方望溪前。能文之士。斷以邦士為最矣。惲子居云。邱邦士文奇淡。不蹈襲前人一言一句。然非正宗。德旋以為正宗。亦非有定式。要在前後布置不

失序吐辭雅醇不蕪則自唐虞以來至於今日其卒不可變者也昔者韓退之之論文也曰無難易惟其是耳如何而後謂之是前後布置不失序吐詞雅醇不蕪即是矣非欲務以艱深為尚也而其近於躁率者必去之非欲務以流便為尚也而其近於晦澁者必去之是即所謂吐詞雅醇不蕪也而昧於此者雖日與之言為文之法宜如是彼且河漢吾言謂若於文字之見有痼疾吾又安能舍吾所聞於師友之訓而從而就之謂吾向者之言實過乎昔人謂太史公記酒肉簿必有可觀德旋以為太史公記酒肉簿亦如其為史記者之為矣何也質而不俚修詞之能事畢矣雖然太史公之所以為不可及者在神明於法而變化無方如第曰質而不俚而已豈惟太史公能之班孟堅韓退之柳子厚李習之歐陽永叔曾子固王介甫蘇明允子瞻子由諸人具能之矣其或文勝而質不足或質而不免於俚則皆不足與於斯事者也自北宋而後為文者之能合於古人與否吾先以是斷之至於理之醇駁則視乎植根之深淺而於修詞之得失無與焉德旋聞吾弟與潤安耶溪諸君於大雲茗柯兩家文有抑揚之論德旋以為兩家各有相勝處未易定其優劣謂茗柯有擬古之迹此固其所不免然即以大雲論其文有全似晁家令言兵事書趙營平屯田奏者而行文軌轍出於管荀諸子不可掩也茗柯擬古亦子雲子厚之匹耳曷嘗句摹字

故如明七子之取憎耶。且若柯亦不幸中道而逝耳。使假之以年。而至於五十六十。安知不盡變古人之形貌。而泯其模寫之迹哉。且夫為文之士。各有所得於天之分。不可以強而能。其可強而能者。謹守古人之法度。不使有軼。因其規而為圓。而周旋也中之。因其矩而為方。而折旋也中之。如是而已。雖其所得於天之分甚優者。亦必徐以俟其自化焉。雖然。士不求為古之文。則已。士而求為古之文。而曰吾惟謹守古人之法度。不使有軼而已。神明變化之境。非吾之所敢幾也。夫誰則肯為是言者。故或且於古人之法度。貿貿然未之知。而徒徵引故實。發為頗僻之論。橫鶩旁逸。不可控御。而曰吾聖於文。吾神於文。世之人固亦有見之。而適適然驚。津津然羨之者矣。而其稍知古人之法者。則已見之。而猶然笑之。故夫謹守古人之法度。不使有軼。乃所以為聖於文。神於文者之資。冀異日之忽不自知。其何以能遂忘古人之迹也。德旋之於為文。所得於天之分未優也。而於古人之法度。不可謂非心知其意者。故願與吾弟及潤安耶溪諸君共守之。而勉俟之。不宣。

張楊園先生傳

張楊園先生諱履祥。字考夫。世居浙江桐鄉縣清風鄉之楊園里。學者稱張楊園先生。父曰明俊。明萬曆中副貢生。先生九歲喪父母。沈夫人教之。天啟五年。先生年十

以補縣學附生。崇禎七年。館同邑顏士鳳家。時東南社事方興。各立門戶。遠近紛如。士鳳與先生嚴相約。毋濫赴。但與里中數子。邱衡輩。相砥文行。曰。存知社十五年。先生年三十二。見黃子石齋於武林。石齋以近名為戒。先生謹誌之。十七年渡江。見劉子念臺於戴山。師事之。歸而自謂有得也。他日於念臺著述中。採其尤者。曰。劉子粹言。吳江張嘉玲佩慈。甲申後。棄諸生從游。請執贄師事先生。先生不內。門人或請其故。先生曰。某生平授經之外。未嘗納拜。正師弟之誼。近見時流講學之風。始於浮濫。終於潰敗。平日所深惡也。豈至暮年而躬蹈之。况佩慈敏而好學。聞善力行。素稱畏友乎。初崇禎十六年。門人歸安吳子琦。請於先生。欲遊復社名公之門。以延譽。先生止之。子琦意甚堅。先生曰。如必不可已。子往拜楊維斗一人可也。先生曰。人不可無直諒之友。子年二十後。得交顏士鳳。方知流俗之卑污。其不至失足於張溥周鍾之門者。皆士鳳力也。其言曰。誤天下蒼生者必此人。君往見彼。則予絕君交矣。予是以懼而止。故先生於士鳳之惠。徒步往哭。收其遺文以歸焉。先生嘗云。聖人之於天道。庸言之信。庸行之謹。盡之。又云。求異於人。即異端也。求合於人。即鄉愿也。盡其當然之分。斯依乎中庸也。所著書曰。經正錄。曰。願學記。曰。問目。曰。備忘錄。曰。詩曰。書曰。初學備忘。曰。學規。曰。訓子語。曰。答問。曰。門人所記。曰。言行見聞錄。曰。近古錄。曰。近鑑。曰。

喪祭雜說曰農書凡十有六種先生之學以子朱子為宗而尤嚴於陽儒陰釋之辨與先生同時學相似者為太倉陸桴亭先生後先生而興起者平湖陸清獻公也清獻公見先生備忘錄一冊以為篤實正大足救俗學之失甚欽歎之又其後海寧祝淦人齊於先生之書采輯精要為淑艾編稱先生盛德所至迴狂瀾砥中流身困道亨確乎不拔實兼統乎河東餘干諸君子而為朱子以後五百年間知之一人吳德旋曰予舊聞張楊園先生為陸清獻公所推重而未嘗見其著述道光十六年予與桐城蘇惇元厚子相遇於鄞江厚子篋中有先生全書及門人所訂年譜一卷予幸獲借觀因次為傳

路慕堂先生家傳

先生姓路氏諱學宏字宏劬別自號慕堂剡溪籍宜興人父諱衡康熙乙未進士為閩之順昌令甫七月卒官時先生年六歲哭踊如成人稍長勤學好古補邑諸生事嫡母湯生母徐能盡孝家貧資教授以為養比居二母喪幾不勝喪見者皆為心惻伯兄季弟並早世無子先生以兩子自幼分嗣之待寡嫂及弟室皆盡禮教授所入泉粟並資焉先生年七歲時讀孟子即解辨義利字故終其身以廉潔自持所至爭迎為學者師而同時諸名宿無不高其學行者乾隆乙酉充拔貢生辛卯本省鄉試

中式辛丑大挑一等。分發陝西試用知縣。初攝山陽令。有趙成者。殺牛延輝全家六人。以其家孤懸無鄰里。成即首其子友諒夜宿牛氏。密殺之。拘友諒至。但號泣請死。無他言。先生覺其冤。密致成妻。廉得成強私子婦狀。又密訊友諒婦於別室。盡輸其情。蓋成既逼淫子婦。而延輝故與友諒善。知其事。將資友諒挈婦過。成知延輝本謀。故銜之。欲殺延輝并殺子。子逸則戕延輝闔門。而即誣陷其子云。獄具例門誅。先生憫友諒遭人倫之變。白廉使。奏請末減當官刑。一時咸服其仁明也。調權麟遊。值甘肅回逆田五亂。據石峯堡。肆焚劫。逼麟遊。先生騎馳境上。傍險築五堡。練鄉兵防禦。城中積糧。選器械分士卒登陴守。募義勇列營城下。號令嚴整。諭居民無恐。逆竟不敢犯。巡若官鳳翔丞陳某。裨將喬某。還回平民馬二。指為賊謀。密報上官。械馬二送縣。希得功。先生謂馬二非賊。微服至馬二所居村。密訪之。果非賊也。竟釋之。而上官業受承等報。謂逆且入陝境。趣重兵戍麟遊。徵興漢兵備副使長白。豐公按馬二。先生速具牛酒慰戍者。戒無騷騷。而自迎見豐公。豐公初問馬二釋。頗疑怪。已而知其事之誣也。乃大服。謂先生有定變才。即撤兵去。逆亦尋滅。授知宜川縣。縣北境於縣治最遼遠。羣木逞。據為數穴。名丐而實盜。千百輩蹂躪鄉落。所至索供。張闌入內。寢脅婦女縫紉。行酒無忌。大為民患。先生購捕盜魁數人。立斃之。餘黨悉屏跡。去巨

猾康彥宗陳亞子恣橫邑中。莫敢詰問。先生甫下車。即名捕之。置之法。一邑稱快。先生以宋儒胡安定張橫渠二先生嘗宦宜川。建二賢祠。躬率士民謁祠下。講東西銘。及教授湖州條約。長幼環聽。俗為丕變。在縣六載。引年歸。去縣時。士民泣送者數百里。不絕。先生之歸。年七十餘矣。然猶簾閣據几。讀書不輟。後進之以詩文相質問者。隨其才之高下而資益之。莫不各有所成就。嘉慶六年十二月。得疾卒。春秋八十有二。二十一年。邑之耆老薦紳文學之士。具先生行己。歷官事蹟。由學博士牒縣申請。行省布政使行臺都御史總督尚書行臺副都御史巡撫侍郎督學使者核實崇祀孝弟祠。

吳德旋曰。先生於學無不窺。尤深畫理。余所見先生畫冊。品格在陳白陽惲南田之間。此在先生為餘事。而世或以是重先生也。雖然。若先生者。畫固以人重耳。人豈以畫重哉。

張畢文先生述

先生姓張氏。名惠言。字畢文。世為武進縣人。父諱蟾賓。常州府學生。母姜氏。先生生四歲而孤。及長為學自成。博聞強識。精思絕人。乾隆五十二年丙午。舉於鄉。以嘉慶四年己未會試成進士。選庶吉士。散館。改授部曹。大臣以先生經學淹通。才任著作。

聞於

上授編修。論者謂自宋時歐陽永叔為翰林。文章稱極盛。乃今復遇之先生云。先生始攻駢體文。同郡惲敬見而歎曰。自相如枚乘歿後。二十年無此作矣。先生以為古作者既遠。士間見日卑陋。將復古道。非我而誰。乃益治先秦太史公書。漱滌磨礱。而融之以道德仁義。故其文。瑟若圭瓚。使觀者望而生敬。可謂獨出冠時。勇紹絕軌者矣。又自元明以來。學者勦襲宋儒之書。空談性命。而近時宗漢之士。專取漢人穿鑿附會之說。矜博炫異。以與程朱為難。先生起而駕前說。能悉會漢宋諸儒傳註。而兼采其長。故一時言六藝者。折衷焉。惜乎年未中壽而遽卒。嗚呼。先生將明聖學以啟羣蒙。而其道未能大顯於天下。承學之士。多用是為勲。然即其所為文。以觀其用意之所在。雖古楊雄韓愈氏之徒。不能過。必傳於後無疑也。先生其可無憾。先生生於乾隆二十六年某月日。卒於嘉慶七年某月日。年四十有二。配吳氏子一人。成孫有弟曰岵。能嗣先生為文。同志交推之。德旋嚴事先生。師友間頗得與聞先生之道。於先生之沒也。思所以永其傳者。因為之述。以俟異日作史者采擇焉。

惲子居先生行狀

先生姓惲氏。諱敬。字子居。一字簡堂。世居武進縣之石橋灣。祖諱士璫。考諱輪。兩世

並以先生貴。贈封文林郎母鄭孺人。先生幼學於父。少長從舅氏鄭環。夢楊遊。然持論好獨出己見。長老皆驚異焉。中式乾隆四十八年癸卯科本省舉人。五十二年充咸安宮官學教習。時同州莊述祖珍藝。莊獻可大父。張惠言。畢文。海鹽陳石麟。子穆。桐城王灼。悔生。先後集京師。先生與之為友。商榷經義古文。而尤所愛重者。畢文也。五十五年教習期滿引見。以知縣用。五十九年選授浙江富陽縣知縣。畢文為序以送其行。其略曰。夫為令之道。六經孔孟之所述。皆子居向時之所道也。以子居為之。其不可以至耶。曰。吾不為彼之所為而已。豈子居向時之所道耶。君子出其言則思實其行。思其行則務固其志。固志莫如持情。實行莫如取善。子居勉之矣。先生曰。善。故敢不求從良友之規。既至富陽。銳欲以能自効。矯然不肯隨羣輩俯仰。大吏憚其風節。欲裁抑之。令督解黔餉。先生曰。王事也。怡然就道。返自黔中。調知江山縣。父喪去官。時嘉慶元年十一月也。四年服闋。入都謁選。明年四月選授山東平陰縣知縣。引見。改授江西新喻。新喻吏士素橫。藐視官長。輕朝廷法。先生至。痛懲創之人。疑先生之為治過猛也。已乃進其士之秀異者。與之講論文藝。斷事不收聲。必既其實。士民懷德畏威。翕然大變於其舊。七年張畢文歿於京師。先生聞之慨然曰。古文自元明以來漸失其傳。吾向所以不多作古文者。有畢文在也。今畢文死。吾當

并力為之。先是臯文與今禮部侍郎蕭山湯公金釗講宋儒之學。是時先生方究心於黃宗義明儒學案。有所見。輒筆記之。未及與臯文辯論往復也。及臯文卒。先生為書與侍郎。其略曰。濂洛關閩之說。至明而變。至本朝康熙間而復。其變也多歧。其復也多仍。多歧之說。足以眩惑天下之耳目。姚江諸儒是也。多仍之說。足以束縛天下之耳目。平湖諸儒是也。二者如揭竿於市。以奔走天下之人。故自乾隆以來。多懸置之。懸置之者非也。揭竿於市者亦非也。且如彼此之相罵。前後之相搏。益非也。夫所謂濂洛關閩者。其是耶。其揆之聖人。猶有非是者耶。其變之仍之者。是非其孰多耶。知其是非矣。何以行其是。去其非耶。蓋先生嘗自言其學。非漢非宋。不主故常。故其說經之文。能發前人所未發。而世之論先生之文者。乃以為善於紀述。而說經非所長焉。十年調知瑞金縣。瑞金在萬山中。俗好訟鬪。素稱難治。先生張弛合宜。吏民咸就約束。有所論決。問法何如。不可干以非義。瑞金諸生楊儀昭。倚富姦。逼佃戶女。事發到官。願進千金求脫罪。先生峻拒之。後屢邀人關說。至以萬金相啗。先生曰。吾自作令以來。苞苴未嘗至門。今乃有此。豈吾有遺行耶。卒論如律。先生廉名素著。至是人益信之。十五年。大吏以先生治行第一。保舉卓異。十一月。至京師。明年三月。引見。回任候陞。是歲刻大雲山房文稿成。又明年。守南昌府。吳城同知。十九年。以姦

民誣告家人得贓失察被劾黜官。先生為人負氣矜尚名節。所至輒與上官忤。上官以其才高每優容之。而忌者或銜之。次骨。及誣告事起。當是時。前撫刑部尚書金公光弼薨於位。今兩廣總督阮公元自河南調撫江西。未至。布政使方護理巡撫印務。喟曰。憚子居大賢。乃今以賄敗。先生既擢。不見用。士大夫之賢者。咸為先生惜。且冤之。而先生不以介意。益務為文自壯。初先生之再謁選也。石橋灣故居已奉其先府君遺命。讓兩從父居之。自挈兩弟奉鄭孺人之官。至是假館所親。無寧居。屬有門下士官安慶知府試往謀之。道遇疾歸。歸寢十日而卒。先生生於乾隆二十二年丁丑二月初一日。卒於嘉慶二十二年丁丑八月二十三日。春秋六十有一。配孺人陳氏。繼配孺人高氏。子一人。弟之子穀也。嘗從子遊。女七人。長適歸安姚。是餘皆未行。孫二人尚幼。先生既卒之三月。余始從穀求遺書。得大雲山房文稿都若干卷。外集及詩詞各若干卷。歷代冠服圖說未成。其治獄別有子居決事四卷。先生之治古文。得力於韓非李斯。與蘇明允相上下。近法家言。敘事似班孟堅。陳承祚。而先生自稱其文自司馬子長而下。無北面。先生所欲有為於天下者。具見文集中。以在下位不獲有所施設。然後之人讀其書。足以知其志之所存也。先生於陰陽名法儒墨道德之書。既無所不讀。又兼通禪理。以為心之故。惟聖賢能知之而言之。佛與學佛者亦能

知之而言之。大學正心修身章。與金剛經應無所住而生其心句相合。故嘗謂余云。論學貴正而不執。然不可雜。雜則不正矣。蓋其所自得者如此。殺以所述先生年譜示余。余病其未備也。乃更參以所聞見。及先生文集。為狀如右。謹狀。

黎珠湄味道編序

盧浙

歸善學博黎珠湄先生見予周易經義審粵行草諸刻。惠然訪予豐湖書院。以其詩集求訂。附以味道編自序文一首。予覽之。知為學道君子。已摘其精語序其詩歸之矣。予因出近作散體文數首。求正先生。擬之南豐西山。復以其味道編求序。時子方罷館還江。匆匆未能卒讀。竊嘗繙其一二。益知先生學道之篤。而誠有味乎其言也。夫道本於天。成於性。而備於聖人之心。顧三代以上之聖人。其道麗於事而彰顯易見。三代以下之聖人。其道見於言。而蘊奧難明。昔者洙泗七十子。皆親承聖人之聲教。而無言不悅。夫子惟許子淵。至其轉相傳述。喪欲速貧。死欲速朽。惟有子知為有為而言。然則後之學者。讀其書。知其味。得其精微旨趣之所存。非好學深思求道而有得者。夫豈易能也。四子之書。漢唐諸儒。代有發明。至有宋而大顯。迨有明定取士制。以此命題。學者髫齡受業。無不誦聖人之言。聞聖人之道。此誠千古不刊之令典。然而誦之者多。說之者眾。羣言淆亂。已不免支離偏側。拘牽破碎之弊。降而愈下。則忘本趨末。以書視書。而不知以道視書。假書談道。而不知以身體道。夫既區身與道為二矣。又安望讀其書而能知其味也。先生此編。察之人倫日用之間。體之行止坐卧之際。審之義理中正之極。辨之語言神氣之微。博旨趣於儒先。探心源於杳默。分

章分節一字一句。反覆吟詠。此其所以含嘔咀嚙。親切而有味也。孔子曰。知之者不如好之者。好之者不如樂之者。先生今者年鼎七十。而氣體康強。豐腴益晬。朝夕一卷。問學不衰。先生之於道。其殆有好而樂之者歟。吾無以測之矣。謹序。

送博羅李明府去任詩序

明府在羅之八月。將去。羅之士民。以明府在羅有平亂功。甚德之。請留不獲。遂相率為詩歌以饋其行。蓋多至三百餘篇。予時忝主惠陽豐湖講席。羅之士有在門者。乃都為集。求刪訂於予。且勾之序。予受而覽之。宮商迭奏。金石鏗訇。其高者既彷彿杜韓。次亦清和淳雅。意餘於文。別擇而提其尤得百餘篇。予以是蹶然起曰。嗟夫。直道之猶存也。信矣乎。雖然。明府之才之學。其功德人人深。而羅人歌詠之不能忘也。豈偶然哉。嘗考兩漢循吏傳。大都以廉介明敏正直克舉其職。至倉黃事會。易危為安。寬猛兼施。文武並用。則惟龔渤海虞朝歌卓卓可述。自漢迄明。史記縣令四百人有奇。其間如李崇之於并州。辛次膺之於蒲城。馬極之於通城。索彥勝之於樂昌。陳敬之於龍川。左應選之於昌黎。類皆有攘除保障之力。然亦僅矣。夫儒者學古通經。孰不矜言體用。顧體難而用尤難。士君子任人家國。求如明之文成學術勲業。交相炳著。此雖古大儒難之。若明府者。吾不知其學何如。方羅陽奸民鵠張。譴起焚戮剽劫。

所過為墟。其勢甚銳。於時舊尹既以是得罪去。而地靡堅。城人無固志。加以狐鼠內潛。槩牙隱動。此豈易為者。明府於搶攘震恐之會。受大僚簡調。起任其事。至即開誠誓眾。曉以禍福。倡修城郭。理戰具。謹伺察。為守禦計。民以大定。既而大兵四集。賊首就擒。所以按緝購捕者。不遺餘力。四境肅清。流移復業。此與龔渤海虞朝歌李牟馬索諸君子。何以異哉。其才如是。其學可知。所講求於體用者。又何如哉。是宜羅之士民。歌詠思慕。而不能以已也。且吾聞之。羅有登峰書院。頗頽廢。明府撫輯稍定。即捐廉修復。此與文翁在蜀。程明道在晉陽。又無異矣。禮曰。君子如欲化民成俗。其必由學。詩曰。翩彼飛鴉。集於泮林。食我桑黹。懷我好音。嗟夫。明府之治。其殆所謂知本者歟。是為序。

許謝氏傳

謝氏廣州番禺某女。早孤。字同邑許某之長子某。依寡母十八年。未嫁也。某病咯血甚。氏母臨問。知不起。歸而戚氏含淚默然。陰屬婢子製朱衫衾服藏之。未幾凶問至。氏涕泣求奔喪。母驚曰。兒未嫁女。何往為。婉諭百端。不聽。則告其家長。危詞厲色。禁之。又不聽。哭且訣曰。兒受若聘矣。如死者何。兒不獲往死耳。其母知不可奪。許之。於是壽所以往服者。乃匆遽無所措。氏乃命婢子出所藏。則朱白衾然備矣。遂行至闕。

國指頴姑前姑訝且拒之曰汝何為者婢具以告姑心動然終拒之曰汝何為者汝完然女也且守節難吾家薄汝舅見背嫡庶子女婚嫁多故未知他日汝年少一轉首樂地多矣何自苦為汝速去無自悞氏泣曰薄命人失所天尚何去之留之連頓顙於地頴肉隆隆起高寸許觀者咸感歎姑憫其誠益心動乃手起曰果爾尚何言氏入室櫛沐服朱衫出拜祖及姑畢易衰跪詣屍傍哭之慟聞者涕落俗禮死者必子若妻乞水沐浴然後冠服氏冒雨提壺出汲往返泥濘中數里氏自辭母至許迄殯殮凡三日夜不食不飲哭不成聲姑強之始飲粥飲水許番禹之望族也越日尊長咸造且弔且賀為之約曰某已矣有妻如此他日諸弟娶妻誰先子者必以嗣不約一族爭之諸弟曰諾許氏廟祀故事頒昨紳耆是歲祭畢特致氏胙歲為例時予主惠陽豐湖講席鄉人劉梵閣有舊於許來道其事予終聽三歎曰是可傳也曰自子與氏言良知陸象山王陽明並宗其說氏生長深閨未嘗說仁義而如此豈非其天性有過人者歟夫國家當存亡絕續之交必有仗節守義之臣而綱常斯以不墜許生已矣氏毅然奔喪節義所感發其族遂為立後氏一正其志而夫婦父子兄弟之倫皆備此雖往冊所稱艱難靖節之士何以過之何以過之

載軒先生既沒之六年。將葬。其子亨衡走書狀京師。屬予志墓。先是嘉慶乙丑。亨衡計偕來京。予見於旅次。端謹樸茂。始識異之。以為其來有自。既而以文相質。并出諸父月川公塲堂文稿求序。予以是得窺其家學。并識先生為學與行之大略。今讀來書。展狀憬然。益想見先生之賢為不易及矣。先生諱某。字載軒。世居彭澤太平鄉。祖諱某。邑庠生。父諱某。候選從九品。先生少穎異。十歲能文。十四歲而孤。母宋太孺人督教之。先生用是感奮。雖少即自勵高其志。願屢試不利。乾隆丁酉。補邑博士弟子。十與賓興薦。不獲解。潦倒諸生中三十年。先生為學治根柢。不事科舉速化。讀書必反復其所以常謂六經之理自在吾心。吾心不求所以自得。徒執前人成說與耳食何異。沈潛宋儒諸書。尤喜道陸子。以為獨得大本。與從兄月川公俱以學古行道為事。暇即過從講習。亨衡兄弟先後相繼就傳趨庭。指授文藝之外。必諄諄於謹身寡過之術。生平無他嗜好。得異書輒喜。家有高樓貯書數千卷。經史子集以及天文地理雜家言略備。自少至老未嘗一日釋卷。著有淡泊堂文集。性敦厚沈靜有養。獨坐一室。不妄交接人。非應試不至城市。接人恂恂然。無疾言遽色。處家儉約。以其餘濟人。歲祿出藏穀減價平糶。兩寅疾革時。邑里亢旱。命諸子所貸粟勿收息。貧不能償者焚之。噫。士於今日學與行之際。難言矣。若先生者。使其得遇於時。行其所學。以

致其用固何如而乃坎壈堙鬱終老牖下噫此亨衢之狀所為嘅泣也然以吾觀往
者獨行履道之士若王彥方黃叔度之流類皆無所施於世而潛德幽光其所以被
當時傳後代者又何如也若先生者其又奚憾與先生生於某年月日卒於某年月
日配楊孺人子四長印元邑庠生次會元次亨僊嘉慶戊午舉人丁丑進士次亨泰
邑廩生長孫豫徵印元出印元會元豫徵兄弟父子相尋卒先生痛之遂得疾次孫
芝生樹生某出皆先生沒後生茲於嘉慶某年月日葬於某山某向謹據來狀志其
略并系以銘

銘曰見其子知其父臚其行抗諸古江漢之濱兮彭澤之許以固其藏兮以永其祜

禮論上

許宗彥

古之聖人欲天下之乂治安也。於是乎為禮。禮也者。靜天下之人心者也。天下之治亂。由於人心之動靜。靜未有不治。動未有不亂。民情動久則思靜。靜久則思動。是故大亂之後。易於為治。至治之極。易於生亂。大亂之後。民困兵革。思所息肩。受命之主出。溫滌而撫安之。天下翕然以定。承平既久。人日眾。物力日耗。富貴者恃財力以縱其欲。貧賤者常不勝歆慕。以生覲倖。在上者繩之以政。威之以刑。民曰。此有位與權者所為也。我一日得其位與權。則所以繩我威我者。我亦可以繩之威之。於是政刑不足以靜民。而益以速其動。古之聖人逆知其必至於是也。故於其得天下之始。因民之思治。而制為一代之禮。以治之。自朝廷以至草野。吉凶萬事。尊卑異等。莫不稽之天理。合之人情。為之一定之節制。而不可越。則民無所生其覲覲。貴者富者行其禮之所得為。不為榮。貧者賤者亦行其禮之所得為。不為辱。上下相磨厲以禮。則無歆慕勢力之心。巧者無所逞其詐。強者無所用其武。雖有兵凶之變。而民猶知顧恤於禮義。則不至於動而難靜。蓋三代所以乂治安。其道實在於是。周之禮視夏商為繁密矣。而享國之遠亦過之。後世如漢之桓靈。不必甚於桀紂。而天下之禍烈焉。唐之昭哀。不必甚於幽厲。而都社一遷。不可復振。豈非立國無本。異於前代者哉。

禮論中

自漢以至元明莫不有一代之禮其異於三代者何哉三代之禮通於上下後世之禮詳於上而不行於下此其所以異也天子制禮者也而禮非專為天子設也儀禮十七篇其行於下者十焉使古禮皆在則雖民間至纖悉事當各有可依守是故經禮三百曲禮三千夫人可以習之鄉閭愚賤皆得觀聽而記識焉古者所以能一道德同風俗合天下為一家豈不由此後世之禮國家有大典儒臣博議依仿古禮而為之以飾耳目而已至於祭祀婚嫁居室墳墓凡民日用之事固未嘗一一為之制焉而其編於禮書者自公卿之家猶未能遵本朝之法而況於庶人乎然則其所為禮者具文而已上之禮既不用於下則士民各從其鄉俗之所尚而又各逞私臆以增之益趨於浮華誕慢而不可止苟非則古昔明道義者莫知其中失之所在蚩蚩之民日相耀於勢利則不逞之心生采章服物無所別而祿位輕四民不相異而賢知絀州黨不讀法社蜡不會民而上下不相親也其使民置然而不靖者皆禮之流失為之也御六馬者無轡銜以習其馳驟則不可以行將三軍者無營陳以習其步伐則不可以戰民之於禮猶馬之有馳驅兵之有步伐也舍禮何以治民故曰國有禮則安無禮則危

禮論下

或曰禮不行於下久矣。今也制之徒不便於俗。擾及天下。而終不可行耳。是不然。順人情而制禮。斟酌今世之所宜。而不必一一求合於古。亦何不可行之有。夫井田封建之不可復者。古今異勢也。若吉凶軍賓之事。豈有異哉。特世愈降。則禮愈難。必也於繁密之中。得通變之道。四民異尚。不乖其業。五方異俗。不違其性。凡民有所動作。一秉於上之節度。則民益知尊君而親上。蓋人情所甚不便者。莫過於無節。無節則貧賤者常若有所不足。而富貴者亦終不能以自暢。即如一送終也。飾以綵繒。或以鼓吹導從。甚且雜以俳優百戲。而又蕩然無等威之辨。割其哀慕。以從頽俗。此豈人情之所樂哉。以一推之。凡事莫不皆然。有聖人作。察人情之所便。事事而為之節。使上下有所遵守。吾見天下之人。從之如流水。唯恐不及。已適鄉野者。與之相揖。邀鄉人必肅然。敬且色然喜。吾觀於鄉而知禮行之易也。夫天下之亂。嘗起於細民。彼細民之力。固勝於士大夫。其爭錙銖較利害。或明於士大夫。獨其威儀揖讓。不能及耳。古之為鄉射禮。為鄉飲酒禮也。使細民習觀士大夫之威儀揖讓。若是者為君子。反是則為小人。目見而效焉。耳聞而慕焉。漸漬於其心。則不義之事。自有所恥而不敢為。而凡邪說怪行。亦不足以惑之。故百姓甯而禍亂不作。民志定而無卒然不可知。

之變。君子治國為百世之計。其必由於禮乎。

悔葺文鈔序

表弟嚴子九能。生一歲。誦詩作徑尺字。不教而能。十齡於屏風上為四體書。擅是藝者。莫能及。四方號曰嚴氏奇童。比長。治經史。務實學。其為諸生。見知於先師朱文正公。江以南鄉先生有學者。聞其名。咸折輩行。引以為友。余於九能為內外昆弟。余侍先大夫嶺外歸。始見九能。談論竟日夜。九能才辨犀利。每杜余口。不得出。余甚怖之。是時九能已刻厲為古文。博舉子業。不欲為。則絕意進取。世遂無以知九能。而九能亦不樂為人知。視富貴泊如也。故居歸安石家村。意有所忿。舍而徙德清。獨與其妻居。頗縉悵不自怡。又所識老成半凋謝。無出游之樂。則益鍵戶肆力於文。嘉慶辛未六月。哀其文八卷。貽書余曰。子庶幾能為我序之。又曰。凡文之作。將以明道濟世。吾於二者皆微之。奚文為。既好之。又業之。不忍然之散之。子慎毋譽我。余於九能文不多見。今乃得先他人盡讀之。竊私自喜。顧受性惰闇。於文尤拙。實無以測九能之所至焉。然九能之以明道濟世二者自勲。則余以為毋庸也。夫為文者。孰不曰我以明道乎哉。其果有明耶否耶。士不得聖人為之師。而又蔽於數千載。是非交錯同異雜糅之說。非有十倍往古之才智者。固無由知道之所在而明之矣。若濟世之文。又有

難焉。伏居一室。未嘗聽睹當世事。以審俗知弊。酌古今之得失。凡行政難易輕重緩急。人情所畏所安。財用之盈絀。事可成與否。靡弗曉。而徒按索故籍。為迂遠難行之論。則不如其已也。且夫道非言所可明。而言有時足以明道。世非言所可濟。而言有時足以濟世。作者或不自知。而後世讀者乃獨得之意。表還以歸功於其人之言者。往往有之。則九能之文。又烏知不為明道濟世之文也耶。

書殉難備攷後

明季殉節之士。所以獨盛於往牒者。非徒風烈勝也。亦實有當死之責焉耳。明之亡。不亡於君若民。而亡於其臣。又不盡亡於大臣。而亦亡於小臣。明之臣。雖家居及為諸生者。莫不好議論。隱持執政之長短。其大臣無論賢奸。皆莫能竟其用。議甫出口。而彈擊之之文。已至矣。兵事之棘也。握兵柄者。將主款則羣以戰誤之。將持重則羣以老師糜餉譟之。譬駕馬然。欲退則前引。欲進則後挽。而又左右掣曳之。馬即良。猶不能不敗績。而況乎蹇駑也。室已將傾矣。看主處其下者。曾不一舉手撐拄。徒喧然爭論。匠氏得失。主人耳目為之眩。不暇審顧。俄而室轟然傾。則羣壓焉。明之亡。何以異此。夫謀人之軍師。敗則死之。謀人之國邑。危則亡之。其死固正。而惜乎無補於國家也。夫天下之患。莫大乎崇虛論而忘實事。故清議興而漢鼎淪。清談盛而晉祚促。

講學會文之風熾而明社屋

汀州王文成公祠記

王文成公之撫南贛也。粵之南韶惠潮閩之汀漳。楚之郴州皆在所統。其改提督軍務。敕書云。或常在贛州。或汀州住劄。是時漳寇方熾。公當統師至汀。復自汀至各營督戰。悉平。象湖大傘諸賊而後回贛。汀人得早安生理。無刁斗之警者。公之力也。郡故有公祠。在篋公祠左。不知廢於何時。廉使李公既構龍神祠。爰於祠左設公木主。俾汀人世祀之。以報公德。汀於漳贛相負揭。溪流詰屈。大崩盤互。在前明屢有竊發。至於阻山自守。與官兵相抗拒。至數年之久。莫敢誰何。而政事之廢弛極矣。非有如公等輩。間出其時。銷折亂萌。扞城於外。則廟堂之上。徒分朋黨角進退。亦何待莊烈之世。而後潢池鼎沸也哉。昔家恭簡公亦於嘉靖中撫閩。以忠信為治。閩人多懷其恩。其時閩方無事。故無赫赫之績。而公獨以平寇尤為汀人所思云。

福州陳氏祭酒嶺墓表

嘉慶十五年冬。翰林院編修福州陳君。自都奉先大人諱奔喪旋閩。道出錢唐。以祖父事狀謁宗彥。乞表墓之文。且言曰。壽祺祖妣前卒。實葬侯官祭酒嶺之原。吾祖所自營也。先大夫既合葬吾祖。今壽祺將筮吉以昭穆祔葬先大夫。表宜為一通。樹之

便宗彥於編修同舉進士。稔其文章行誼所自。敬諾不敢辭。按狀贈奉直公名起龍。字武桓。一字雲田。閩縣學諸生。先世自泉州惠安徙坑鄉。遷晉江後市鄉。再遷郡城。至文侯君名式璜。始家福州。是生植園君名應瑞。植園君生子三。贈公其長也。少貧。當廢儒業者屢矣。卒不改。終其身處約。彌遂於儒。子孫皆親教之。不名他師。制行醇直。老稚咸信之。卒時年八十一。如植園君之年。嘉慶九年甲子十一月某日也。配曾宜人。勤婦職。善事其姑。生子一。即封奉直公。封公名鶴書。字錫三。一字東麓。少穎敏。郡邑試必高等。時相繼視閩學者。皆名臣。莫不重其品學。亟稱之。早食餽。顧不得意於省試。久次為歲貢生。歷主書院講席。教授弟子成名者甚眾。為人恂恂然。忠信自守。善為詩。冲雅如其人。嘉慶十五年庚午七月某日。卒於上杭講舍。年六十有五。配郭宜人。生子三。壽祺。壽愷。壽富。壽祺。嘉慶己未科進士。翰林院編修。充文淵閣校理。國史館總纂。壽富。縣學諸生。孫四人。兩世皆以編修貴。累遇覃恩。贈封如其官。陳氏。上世務農事。贈公始耕且讀。為學甚苦。封公繼之。志尤篤。至編修而乃克有聞。編修既仕於朝。燕閩相去半萬里。俸入薄。不足以迎養。封公雖老。猶頻年於外。挾冊講授。謀事育之資。贈公卒後六年。而封公亦沒。編修創鉅痛深。實抱無窮之憾。而深悔其入仕之非。其所述至不可卒讀。嗚呼。以累世讀書之困。而幸而有成。復不能享。

其榮利則夫勉子弟於學以求聞達者其果不盡然耶夫為人祖父其所望於後者固樂其能伸己志一洩幽滯拂鬱之懷豈樂其朝夕之在側哉人子盡其養志之孝於己而有所不可致者天也夫編修起海嶠人詞苑以經義辭章傾一時為

上所知遇凡贈公封公之學術亦既聞而明之俾咸知有闕陳氏之學鄉之父老莫不太息謂陳氏祖父誠善教其子孫然則兩公雖未昌其身而名之昌固已至矣況乎編修他日陳力於國家布惠於氓庶皆將於家訓乎取之吾知先靈之所慰者更大爾贈公葬於某年月日封公葬於某年月日是為表

國朝文匯乙集目錄

卷五十九

錢寶甫

原名昌齡以字行更字子壽號估齋浙江秀水人嘉慶己未進士官山西布政使有恬齋遺集

辨惑

一

與吳侍郎書

一

卅亨從軍圖記

二

湖天海月樓賞雨圖記

三

書史烈女事

三

書蕭貞女事

四

陸

鼎字子調號鐵蕭江蘇吳縣人鼎布衣著有梅葉閣詩文集

論文

六

拜泉記

六

重游香雪海尋詩記

七

元義兵指揮千戶金公傳

八

書羊祜傳後

九

吳賢湘

號清夫福建甯化人嘉慶己未進士官邵武府教授有清夫文集

讀魏冰叔宋論

十

論淮陰侯韓信

十一

說丞相宏如發蒙振落論

十一

論蜀漢荊州之失

十二

狂言

十三

海樵高君墓志銘

十三

陳

斌字陶軒號白雲浙江德清人嘉慶己未進士官安徽同知有白雲文集

行儉論

十五

存恥

十六

世教隄防論

十六

論秦弱

十八

僧如鵬傳

十九

姚烈婦金氏傳

十九

張

澍字時霖號介侯甘肅武威人嘉慶己未進士田原改官江西永新縣知縣著有養素堂文集

十九

人才論上

二十一

人才論下

二十一

書王貞女事

二十一

劉星五先生傳

二十二

何梅生小傳

二十三

國朝文匯乙集卷五十九

辨惑

錢寶甫

錢子之鄰潘老者其祖父為樂工潘老及其子亦為樂工里中小兒十數人從潘老受其業始識字繼審聲然後辨其長短高下疾徐之節師歌之弟子隨之十數人者日再周學勿能勿惜也錢子見其勞也謂之曰子老矣尚少休潘老曰嘻工之子恒為工猶士之子恒為士雖欲舍諸為得而舍諸錢子聞之喟然歎曰今之為士者其祖父能讀書其子孫未必然其祖父讀書而教授生徒以為業其子孫未必然間有習祖父之業者雖未必為賢子孫或不失為有恆之士乎然而笑之者有矣謂天下謀利之道多端有逸而獲者有勞而不獲者子讀書無以為生日從事于章句訓詁為童子師方愧悔之不暇而尚以誤己者誤人乎於是從而惑之者有矣業祖父之業謀逸獲之道其所為往往為鄉黨所恥笑久之心目勞而計目拙即欲反其故業而有所不能嗚呼是潘老之不若矣潘老之不若而尚得謂為士乎夫士之無恆心也由于多所惑矣錢子懼邪說之足以惑人心也于是作辨惑以示里之讀書而習祖父之業者

錢子既作辨惑或謂之曰子言誠是矣然使讀書而無用僅可為童子師其所造不

甚淺乎。錢子曰：不然。夫學所以求道也。格致誠正，修齊治平之學，人皆可能。讀聖賢書於我心，實有會悟，躬行實踐，出則用其道於天下，處則用其道於一鄉，可進可退，可屈可伸。若人存乎以為深乎淺乎，大童蒙之求我也，教之當以德行為本文藝為末，勿汲汲于科名，藹然孝弟，無流俗氣習，他日立朝庶幾忠以事君，慈以使衆，廉以律已，其不悖乎道者，即不負所學矣。彼讀書無內行，而以苟且取利祿為能者，亦其于為童子時，無師焉以教之耳。夫學必有師承，唐宋以前無論矣。前代如康齋、白沙、敬軒、陽明諸公，雖學有異同，而受其傳者有功業有氣節有文章，造詣卓越，豈今人所能及。其萬一然，則惟讀書乃能有用，而可以為人師。若宜易言哉。豈易言哉。今人溺于流俗，往往恥為童子師，雖學不逮古人，然與其蹈非義而自以為有用，曷若安于卑近，而日事章句訓詁者之猶不失于正乎。而即以此譏讀書為無用，僅可為童子師，則不然也。是又不可以不辨。

與吳侍郎書

聞閣下未到京，即拜少司馬之命，旋即命為倉場侍郎。愚至渥也。遇至隆也。諒閣下必有所以仰酬。高厚者，顧念倉場為天庾重地，積貯在焉，糜祿出焉，日久弊滋，始也旗丁受其累而卒也百姓蒙其害，敢為閣下陳之。夫漕務之不清久矣，屢

奉明詔而終不能掃除而吏張者何也。嘗見十餘年前。州縣辦漕必肥其家。即吏胥亦無不驟至數萬金。今則不然。上官不索州縣漕規。而州縣常不足。州縣必藉吏胥舞弊。而吏胥不樂為。其故由於漕之浮收不能欺上官。每取所浮以補通省之虧空。而州縣之入索少。亦不能欺旗丁。每視所浮以索兌漕之費用。而吏胥之詭計窮。近時兌費頗增。各省皆然。即以浙江言之。一縣以萬計。一省約須二三十萬。旗丁之日用不過十分之二三。乃自押運幫官以及巡漕總漕倉場各衙門官吏。在在皆有使用。而倉場為尤甚。使倉場吏胥之欲飽。則泥沙皆好米也。吏胥之欲不飽。則好米皆泥沙也。其權之重如此。且夫州縣不能違拘旗丁。但願速兌。而費有所不惜者。督撫司道不能深知也。旗丁不敢違拘倉場。惟恐不收。而費有所不惜者。倉場總督不能深知也。旗丁不得不需索州縣。而州縣之浮收有名。州縣不得不浮收百姓。而旗丁之需索有名。其勢相因。其弊相仍。有必然者。夫江浙為膏腴之地。財賦甲天下。然而數十年來。十室九空。不遇凶荒。斯可耳。若連年歉收。將正賦之不足。而尚可浮收乎。不可浮收。而有不得不浮收之勢。縱不至激而為亂。而百姓之生不日以蹙乎。設欲浮收而不能。旗丁兌費不敷。因而誤漕。其害更烏可言。然則欲州縣不浮收百姓。必先使旗丁不需索州縣。欲旗丁不需索州縣。必先使倉場不需索旗丁。或曰。倉場

國朝文匯

卷五十九

二

國學扶輪社印

以下官吏不下數萬人。苟盡去其弊。將何以為生。實甫以為旗丁需索州縣必有一二狡猾者。包攬一幫之費。而其餘則拱手聽命。倉場吏胥之需索旗丁。其技亦若是。閣下第察其為首者懲之。毋苛求。毋過急。但期于事有濟。于百姓有益。是不必盡去其弊。而弊已無不去。若以姑息處之。則此數萬人者。藉此存活矣。而有漕地方。民之困於浮收者。奚止億萬人。以億萬人之性命身家。而與數萬人相較。多寡輕重之間。非身當其任者所宜詳辨者哉。僻處鄉里。知其大略。不能悉其細微。閣下為朝廷重臣。所任甚鉅。而實甫于閣下。受知最深。姑一舒其狂瞽之見。試訪于眾。而以實甫之言為是者。則取而參酌行之。否則亦等諸無稽之談。存而不論焉可耳。

冊亨從軍圖記

嘉慶丁巳。永濟崔雲客先生。以學士出守思恩。黔苗蠢動。粵制府覺羅公吉慶。督兵進討。先生從焉。當是時。勦撫並用。民間賊來遁山谷不敢出。或累數十日。半餓且踣矣。先生奉檄發財粟以濟之。躬歷危險。經畫機宜。所全活無算。既奏捷。寫冊亨從軍圖以紀事。冊亨。貞豐州境也。未幾。還泗城。泗城自唐以前。為蠻地。宋始內屬。顧地邊遠。又值兵後。益難治。大吏實倚先生才。居數年。乃遽平樂。數月以母憂去官。踰年。來駕湖兼書院講席。昌齡方家居。晨夕過從。聽先生談軍中事。因出此圖。圖未有題者。

屬昌齡為之詩。昌齡覽之慨然曰。苗民獫狁且愚。其蠢動也有激之者矣。為民牧者。既不能化導於未然。迨迫而思還。又不能鋤其强悍者。恤其疲弱者。變患寔成。不得已而用兵。則又畏死退縮。不足効大將指臂之用。嗚呼。若人者。固已重負朝廷。亦何以自安於夙夜哉。夫人臣受爵於朝。豈必居將相之任。始得以展其謨略。苟盡厥職。官雖卑。亦可為國家捍邊圉。消反側。使百姓終身不知有兵革之苦。不然。即身處高位。而無所設施。其于國與民。果何裨乎。先生官中外二十餘年。東承庭訓。徑直自勵。而處事和平。民咸戴其慈惠。先生之政績。固不僅于此圖見。而此圖未嘗不可見先生生命意之所在也。昌齡不工詩。且以咏歎長言。未足盡意。乃雪夜呵凍。拉雜書卷尾。如此。先生得毋哂曰。後生少閱歷。好為大言。他日膺民社。果能如紙上所云乎。抑不免苟同于流俗乎。昌齡當敬對曰。士無論出處。官無論尊卑。但期無愧此心。無負所學。則所以報君者在是。報親者在是矣。先生以翰林前輩。為吾鄉學者師。昌齡同館後進也。以後進而議論于先生之前。幾不自知其狂直。蓋皆平日所欲言。而不敢言者。藉以質之先生。先生其必有以進昌齡者矣。是為記。

湖天海月樓賞雨圖記

湖天海月樓。在萬蒼山麓。先塋之左。其向向永安湖。湖束腰形。東處左鷗山。右鹿山。

孤雲兩角。自樓視之。如戟門。門間有隄。隔為裏湖。外湖。湖前抵塘。塘綴煙戶數十家。塘外則海濤接天。越山隔岸。若隱若現。當夫晴晝月夜。湖平海濶。水光瑩然。山容悄然。俯矚遐眺。無景不快。又奚必雨哉。雖然。不得雨則靜也。非動也。非動不變。雲興雨來。風旋雨去。必三者合并。頃刻萬狀。而山水之觀乃極。乙丑三月八日。余與從兄順甫。展墓來山中。是日也。春陰盡霽。輕雨霏霏。憑欄而望。見有笠屐蹒跚來者。近即之。吾友吳子修也。呼之登樓。坐未定。雲罩滿山。風馳雨驟。其乍布也。如萬綆之直下。其大沛也。如千瀑之齊飛。其激水而跳盪也。如珠盤之亂走。其乘雲而低昂也。如明簾之倒捲。雨白於水。山白於雨。眾峯盡掩。大海迷茫。俄而風定雲斂。閒鷗數點。浮沈波面。隄上人影。跨犢徐過。羣山如醉。初醒。如客初歸。濃碧淺青。如安妃之新沐。此豈晴晝月夜所能有乎。相與燒燭暢飲。劇談至更深。簷溜既急。萬籟聞然。欹枕卧矣。忽有聲自西北來。銕律恠突。屋瓦震撼。急起視之。狂電煜燐。山谷銜樞。指顧倏忽。而霹靂已入海去。於是約兄作圖。子修作詩。而昌齡作記述之。竊憶司空表聖所云。賞雨茅屋。木必有此奇也。

書史烈女事

史烈女者。秀水史家村人。明建文時。徐王府之賓。輔名彬者。女之遠祖也。女生而端。

重年十六許字仁和沈守坤守坤為觀察世無次子我錢之自出也觀察罷官後備居於和而以官逋遊四方守坤年十七赴童子試於杭州以疾歸旬日而死計之女家女方刺繡聞變即以剪刀盡碎之七日不食痛幾絕泣請於父母曰壻雖死兒誓不為他氏婦曷令兒即歸乎父母度不可驟移其志也姑以觀察未歸安之女日夜飲泣見守坤於夢守坤足微蹠舉足示女言自杭州來女驚寤徵之所親而信於是求歸之意愈急先是守坤死厝柩於茶禪寺東僧舍女廉知之乃請其祖母禮佛寺中寺故多舊棺女顧問老僧厯問其姓氏若無意者至守坤柩遂色變不復詢歸而謂其婢曰我必歸於沈否則我必死我死無易我衣履慎誌之母洩蓋女自聞變日即衣素衣麻結髮雖令即不易如是者二年女年已二十矣既而觀察自楚返女之鄰有卜姬者數往來於城女聞觀察歸即促母倩姬以己意告沈姬未及往觀察微聞女意而未悉也召媒曰禮女未嫁壻死斬衰往弔葬而除之未嫁守節非古也汝曷為我以禮辭之女知媒來即出聽聞所語黯然而白父母曰兒實自願沈宜必不欲兒之歸乎且兒歸猶得與父母相見也父母不以女言告媒媒竟去女乃歎曰已矣勿復言矣時日方午女攜水入臥室頃之不聞聲婢疑焉排戶入則浴畢整衣投繯氣絕矣媒所居距史十餘里急追之猶在中途也觀察命僕婦馳視殮天酷暑一晝

夜而女貌如生死之日。為嘉慶元年六月十七日。越三日昇其柩同厝寺舍。嗚呼烈女之死。當七日不食時。其志已決矣。或疑未嫁而死。為過奢。孰知以身許人。嫁與未嫁無異也。設烈女得歸於沈。是可以不死。要其必歸之心。即必死之心。若烈女者可謂求仁而得仁矣。觀察以寶甫為親串。故知其事。悉屬書之以請於世之能文者。

書蕭貞女事

戚明經壽平。居南門外之萬蝶浜。癸亥十一月初五日。過余曰。有比鄰酒家兒李焜春。聘蕭氏女。年二十有二。十月二十七日。焜死。訃于蕭。女聞之。去舊珥。易衣將歸李。女無母。父勸之再。翁姑遺媒止之再。多聽二十九日。竟歸。李痛哭視焜殮。即代姑執爨濯衣。奉事靡多。謹姑性悍。翁素憚之。既不欲女來。又見其貧也。晝夜詈女。女唯唯無一言。居鄰不忍聞。以理責翁姑。翁意稍喻。而姑即詈翁。詈鄰人。鄰人無如何。重為女憂。謂君盍約城中人往覘之。使知事聞四境。不特鄰人為之不平也。次日。余與蕭若果齋從兄雲門一齋。從弟厚甫。逕造其家。呼鄰人叩之。言與明經同。乃謂其翁曰。爾夫婦毋凌虐貞女。貞女光爾門。爾宜善視之也。翁曰。奈我婦何。遂告婦以城中人來意。婦見坐者皆衣冠。戶外環立數十人。不敢言。但語其夫曰。我不與女同室居。女亦無食我飯。於是眾皆知悍婦之卒不可化也。爰議于所居樓後。開小樓居貞女。釀

金助女薪水資。而明經及其鄰。履景章室。其事嗚呼。若貞女者。其遇可謂苦矣。然非是則貞女之名不彰。女生編戶之家。無詩禮之教。而能明大義。勵節操。若此。豈非其天性然歟。是可以為流俗勸也。余因即所聞所見而詳記之。俾後之修志者。或可採焉。

論文

陸鼎

學子問於陸子曰。立言家論心之有聲也。然乎。曰。然。惡從而聞之乎。曰。心無體而體聲無跡而跡由畫其心聲之發而形之者謂之文。是故文者人之心聲。堅金石無不貫。幽鬼神無不通。固非空疏恣恍之辭也。語其至。昉自六經。逮乎百氏。有其實自冥行尚心學晦淪於功利而遂考索於影響之間。詞義之末。侈侈經經皆然。宜子之無聞焉。習舊矣。夫人心者天之衷也。無聲無臭。體其隱也。而統一萬物。渾一古今。隨而不見其端。迎而不見其倪矣。而樞紐化機。根柢品彙。乃顯於有聲有臭。鮮離世道常變盛衰之故。無外子臣弟友之職。蓋文之所從出。聲教之所繫。天以人為心位者。任焉賴焉。其用大焉。而世以虛無意之視之。於是乎冥行尚抱典冊。局章句。侈侈經經。以為六經百氏之實。斯在而我得習焉。亦曰斯文者斯我之心聲也。然乎哉。學子曰。若然。必有聞之之道。敢請終言之。陸子曰。修其天而后修乎文。庶幾啟其聰。與曰。修天奈何。曰。一誠無我而已。是故為命為性為窮為達為壽夭為患難一稟乎天。則有以神明乎物類。芸芸萬起萬滅於兩大間者。唯此一心之隱顯聲而已。文而已。聞而已。哉。則凡春之冲秋之秘。而鳥嘯嚶而蟲嚶嚶。夏鬱陶而草怒。冬寒泣而木號。至於竅泉穴壑。鐘磬瑟筑之音出焉。獸鳴虎嘯。沙鷺石走之類生焉。是率物之洪纖巨細。

而鳴者莫非心聲。可形可丈。顧非丈之至。舍其大歧。言乎一草一木一山一水之微。而天人將安賴也耶。吾故當觀於風行水上。而知前人言為天下之至文者。無其實詞而已。願因斯義。為子擴言為丈之要。而終知心聲之大焉。今夫水。氣機之所化。循乎道。體源源而來。帖然恬然。百川效順。而莫知其聲向。及風與之關。而境為之逆。鼓其怒。若雷霆馬排山撼嶽。勢立無前。而不失就下之性。不歸大海無止。由此準之。世道子臣弟友之職。處天下之安而安。遇天下之難而難也。於其安。則怡怡然。惴惴然。率其常行。若無異於愚夫愚婦。及其難行。其變發。其心聲炳薄星日而震天地。為忠孝義烈之倫。明大節。不可奪。猶水之折衝險阨。無所避。必歸其有極。此其故孰使之然耶。謂非體之天者。顯其心聲之實。而用之者耶。苟非賴有斯人。主宰乎兩間。人紀秩而天叙順。物物不失其則。履載之道。幾何其不熄耶。夫然際其心聲所發。盡之形之。要不必盡同六經百氏。聞者有不振起。慨然太息。感仁義之當然。合然而不知其由然者乎。此文之教也。世道之所繫。不謂之至且大乎。吾人具是心。願學焉者。而處盛世盛年。可不修其天而修其文乎。烏有嗟貧悼賤。汨沒於利欲之鄉。承顏乎高銜大貝。而挾其文為資生。譯世之具。顧有侈侈硜硜。而為立言家。心聲之所在。悲夫。

洞庭東山有吳淞環湖抱嶺土膏木潤華實之被山沃若也山下有乳泉穴於石若古井然空光下凝清湛澈底味甘冽經冬夏不少變名不著雖山民亦鮮知者惟一二羽流識之謂遠過惠麓云客有採藥是山遇羽流導飲焉歸述其事余聞之有若抱道士負其貞白之質託跡巖阿者也亟欲一見以自廣未果也歲壬戌之秋會有石公游始偕客訪焉時湖中秋暮生短櫂潏潏一夕而至則相與拾墮樵煖松子聽瓦鐺奏響林風竹韻嗒然清遠覺湖滌浮動眉宇高寒不知秋陽之為暴顧謂客曰佳哉此龍蛇雜處之故墟也而今芒屨竹策得從容於山巔水涯嘯歌自得斯境謂何如哉於是甚適選石而坐呼奚奴進具對啜之味果遠過惠麓甘寒而有力焉然後知羽流言非欺我古者竊怪世所稱水陽秋按劉名山大川備錄無道烏知有出於名山大川上者乃在窮谷中也噫人鮮知也固宜顧造物者乃無意耶離其境離其垢全其天泯泯然名實俱遠則余有以知其類夫抱道士之流亞歟昔人有慕陳希夷風入山而下樵夫拜者我今得在禮之野焉飲其風拜其潔烏在名哉客曰子若欲以拜名斯泉耶固善第史志有之或解一軍之渴或拯一方之患類皆出山事恐非相答之宜陸子喟然曰客何見道昧也夫使此泉苟有利於物其就下之性非上善之德與易地則然毋徒見滔滔日下者而泥之吾則曰此污萊之流而已矣

重遊香雪海尋詩記

吾吳山水會脈於天目。震澤之一融一結而神秀名區為東南最。乃華實沃野。林壑幽閑。尤美在郡西諸境。而鄞尉與焉。獨以梅稱。然梅之名。顧香雪海特著者。則以志載康熙中商邱宋公撫吳時。與其轄下士。選游於此。而有剡崖標勝之處。故也。以是華時登探者。遙矚湖波環映。潔白無際。益以煙月。則不啻珠其林而冰其壑。仙仙乎。有忘世離塵之想。而山之農食力於梅。養生送死於其中。合其村宛爾古之一小國。視全吳之產厚其生者。莫此天民若也。余樂之。愿事耒耜。終老此中。而志不可得。於茲五十餘年。惟尋我詩之所在而已。悲夫。然吾詩不能久待於梅也。則無華時亦嘗至焉。故有空山落梅葉之句。或人非笑之。以有葉無華。世所共棄。而吾獨取彼怪生焉。彼哉彼哉。由未悉其游焉。尋焉。與夫遇焉。得焉之與世殊焉。而當其游。衣草衣而失其為寒。食糜麥具而失其為饑。踽踽涼涼。挾一囊入是山。而目無梅焉。靜機契然而非清靜之靜也。動樞闢然而非羣動之動也。尋其尋焉。尋且泯焉。及天之端倪。露人境化其來矣。則帖然恬然。超然曠然。潏潏然洋洋然。鏗鏘然戛戛然。然而不知其然而然。於是乎遇而得。於是乎而華而葉。且無惟吾詩在囊滿而返。傲然示之吾徒。而吾徒咸默然。一客獨慨然曰。陸子詩其源出於天。其遊天遊也。其所得悉天士之

精神固難悅世目。夫然則天懷自賞可也。奚執塵滓中人而強其解乎。余笑與之語。則深知斯道之甘苦者焉。以謂難能。未幾客造訪梅葉閣。揖余而言曰。空山無人。獨住獨來。而造詣乃爾。吾未嘗一識其境也。此其時矣。乃特買一舟。命其奚奴。具襍被。笠履壺尊楮墨之屬。及夫山之翼。水之鱗。精其鑒。良其醢者。靡不載。而請余偕游焉。蓋亦有欲乎詩者焉。既至。道鄧尉梅田。蹊徑無然。初不之意也。繼升乎所謂剡崖標勝之處。則向之香雪晴空。而浩如海者。有若方士家言。蓬萊清淺。幾欲揚塵矣。余訝甚。亟執農者詰焉。農者曰。客何為者。語之故。惜曰。是冊子蒙目者也。惡能見吾農乎。歲稔頻矣。田彼梅而俟其實。非其時何望。故伐之為薪。而抵於市。可易升合食。以沾活我老弱。者山中比戶然也。客嚶嚶然。士也。而以詩尋。為曾足供饕餮者耶。抑盛衰之故。唯梅是問耶。將不適於觀。而有遺憾耶。余喟然曰。甚矣時也。去幾何哉。而一變若是乎。矧梅之為物。高衆木而鮮匹。有世外若人之目。亦見每乎。是故清遠士好之。在文章山水。固恒相因也。而農者何譏焉。甚矣我喻之也。彼不自咎。不力於稼而力於植。異其趣。失其業。乃尤士之不力於道。而力於藝。異其趣。失其學。士失學。農怨矣。何言之。蓋凡農之困。士之責也。夫士何事。尚志乎。顧惟深衣厚食者衆。率玩時而忘世。此天下饑寒之所係。君子之憂也乎。噫。孰謂野無人乎。雖然。我疑焉。行有類乎君。

予者道未至也。夫士之為士，出處不二者也。彼徒視喁喁然膏身而譁世者，以謂士止爾爾。若然，躬耕畝畝，高蹈邱園，悉有其科目，何哉？苟無其操，又孰知乎道之所在，即志之所在，或顯或晦，無異趨也。惟其異趨，則孰咎孰尤哉？客曰：嗟乎！今而後吾知農之難為其農，與士之難為其士，固已。而梅亦難為其梅矣。獨可謂詩之易為其詩乎？何我境之不過人心，若此天倪將安睹，而予之囊亦有空時乎？余愧無以自解於客，惟是梅有災，昔所未聞，不可不記，以告登探茲山之士，或可補志乘之缺云。時嘉慶十二年丁卯之寅月，客為同郡學沅周君也。

元義兵指揮千戶金公傳

公諱宏業，字可修，姓金氏。其先有諱璫者，宋將仕郎，南渡時從行，徙吳江松陵里。遂著籍累世同產。六傳至公，能世其家，個儻有氣略。督子孫恭嚴耕讀之暇，則習騎射。後治業邑之吳苑鄉，因家焉。姓益著，號下保金氏。其名吳苑鄉為下保者，由公禦災捍患，保障一方而名者也。素其地在今兌峯之陽，濱太湖，巨浸公生丁元末造，中原血戰，民無寧宇。其時沿江瀕海，盜賊蜂起，太湖尤為通逃藪，毒流吾郡者。方國珍、張士誠稱劇焉。國珍尤桀黠，多誘亡命，數窺吳中。至正八年，其黨與湖合，焚掠諸鄉，聚氣甚惡。公乃毅然倡義，發所積粟，團民兵為鄉社保障計。請於官，官壯之。蓋公義信

素著為一鄉推重。由是率其子弟與鄉勇三禦盜而公之兩孫榮一榮三皆力戰死。公痛之眾亦奮。十二年冬盜復至公手殲三十餘人縛其巨魁大破於黃洋灣賊黨勢蹙乃遁無敢覘其墟。迄為吳之亂又十餘年里閭卒保無恙者公之力也。初湖氛既息民之流散者稍稍歸公憫其窮露安插而衣食之有老病不能耕者募傭代之種樹民賴以存活環其境且數十里咸感公德故志其鄉曰下保云。時明祖方起兵和陽江浙行省猶為元守上其事授公義兵指揮千戶。徃其間曰我金公諸孫李潛輩與余遊乃述公節概而請余為之傳竊聞揭揚義烈昔賢謂宇宙間絕大文字願讀陋如余烏能當茲哉固辭不獲已乃撫拾其事如此。論曰公投袂而起捍衛鄉邦其功偉矣雖古之豪傑何以加茲當時史臣宜有列傳用昭厥績夷考明史諸傳有謂元以國珍故募士海濱至有一家數人死事不蒙卹錄者其即公之謂耶而禦湖盜云云僅見通志數語可慨也已。

書羊祜傳後

羊叔子姿度廣大而高朗兩晉之間事功之士或鮮其匹乃其登峴山與從事郝湛語輒悲夫陵谷之變遷而身名俱滅抑何其不諒也與史稱叔子童時索其嘗弄金環於乳母而母罔知所謂乃自往其鄰李氏園保得之人始知叔子為李氏子之後

身也。嘻人之生死去來。殆若大海一漚。起滅無時。故李氏之子。可為叔子。則自李氏以前。而其為身為世為姓為名。我不知其為幾生也已。奈何獨於羊氏之一生。而悲其身名之俱滅耶。嘻。豐功偉績。鴻名美譽。等若塵起灰伏。變在俄頃。而其人骨既朽矣。斯則舉世所由然而悲者。與顧獨夫天地委形。有不變者存。惡知七尺之軀。非所論也。今天有身。而后有世。有世而后有事功。而事功出於性命。夫性命者。豈有之哀。天之實也。是故體天之實。內之則為聖學。外之則為王道。無二致也。抑孔氏之所宗。百氏之所歸。開物成務。萬邦作孚。寧外是哉。惡得以虛無寂滅。而視身世為幻如也乎。此豈老釋之罪。為天下害者耶。無若中世棄性命而不講。專以事功稱。則烏能無愧於仲尼之門。而宰物之權。乃出於申韓之術。曷怪乎治具之敝也。經學之晦也。器識之卑也。生死之惑也。莫不由之。故雖命世人豪。而見地若叔子者。史不絕書。嘻身沒道存。斯為不朽。堯舜事業。若泰山上浮雲。過目為果。胡謂耶。

讀魏冰叔宋論

吳賢湘

辛亥秋夜吳子縉魏氏文集見其宋論二篇咎岳忠武班師朱仙鎮而惜其未可與權吳子廢書而歎曰魏氏烏知權哉跡其所言亦驚於功利而已孟子曰嫂溺援之以手者權也夫權時與義而得其宜則權矣利者義之反聖賢處事計是非不計利害得其是則不疑于所行而成敗利鈍舉非吾之所知書與大易所言吉凶吉凶以義斷者也其曰利曰利有攸往曰無不利則義之和也故又曰利貞聖言教萬世豈為小人謀哉且利之為害昭昭也昔周失其御七雄雄閼士恩出其金玉錦繡而以利奸諸侯王諸侯王靡然從之秦為加甚時號虎狼之國然頗能以利顛倒人故捐五千金而稷下士爭骨了郭開以萬斤金遂并天下然所與謀天下者率妾婦也賈山曰秦俗諱諫夫秦諸臣視其君如天地鬼神雷霆之不可犯特利之耳李斯見倉中鼠歎曰人當如是矣故趙高得唱以丞相之利而立胡亥死扶蘇故斯燬二世而上督責之書故矢及二世幕左右曰臣昔言丞相今不能在側矣且夫義之與利敵者也而勢則萬萬不敵何也天以其氣生人以其氣之秀為人心之理而聲色貨利一切奪義之物預待於我生之前而饑寒驅之妻子驅之刀鋸刑威亦驅之義之不能蓋必矣先王知其然也取人心風俗之原而謹持之不能禁人之欲利也能使之

知利不如義而已。不能遽必人之知利不如義也。能必吾之心與政。有以示天下之利。不如義而已。夫上者下之鵠也。鵠立而衆射畢志之矣。上貴仁義而賤功利。則中者勉焉。其上安焉。其下隨焉。隨之久。固未有不安者矣。上貴功利而賤仁義。則中者勉焉。其下安焉。其上移焉。移之久。亦未有不安者矣。東漢自光武不臣子陵。章明繼之。漸摩累世。流及桓靈。上之政教雖真。下之風俗既成。黨錮禍起。至解綬偕逃。兄弟子母爭生。夫寧不知禍之不旋踵哉。慕義故也。魏武奸如鬼。其勢力足以亡漢。而事獻帝。終其身嗚呼。人主以眇眇之身。託千萬臣民之上。恃名義相固結耳。尚義雖失。而過激猶得。東漢之氣節尚利。則為秦之二世而亡。千古保利棄義。莫如秦。得禍之烈。亦莫如秦。子故論之以戒後世之貴利者。漢宣亦驚功利者也。其言曰。漢家祿用王伯。奈何純尚德教。嗚呼。義利不兩立。漢安所得祿。直伯而已。孔光為莽上請。秦張禹不敢斥王氏。則功利之應也。史民上書言莽受新田者四十八萬餘人。王公宗室皆叩頭為言。則亦應也。然即漢宣時。王成已虛增戶口受賞矣。則應之已先也。秦罪浮於桀。漢宣則人之所尊也。練羣臣。核名實。盛矣。史有述焉。顧余以為其心與政。無以示天下之利不如義也。秦之應速。漢應較遲。故余又論之以戒後世之勤宵旰。明政刑而不能謹人心風俗之原者。然則魏氏之為是言也。奈何生當明季。憤亡明諸

臣之無實用。日講求兵家陰符。及縱橫家言。忠武已事。有以觸其發憤。思有為而堙塞抑鬱之氣。而不覺其見偏而言謬也。此魏氏之世也。孟子曰。不知其人。可乎。是以論其世也。然而蔡虛齋亦為是言也。奈何析義之未精也。蔡與魏皆君子人也。而其言均足以長功利。予故又論之以示後之用權者。

論淮陰侯韓信

人如器矣。有將器。有相器。有天子之器。上相興禮樂法度。次總綱紀。厲人才。為國樹長畫。佐天子治天下者也。大將寬剛。萬人將。桓桓烈烈。為天子取天下者也。其器皆不能。有天下。有天下者。志天下也。海涵地負。雖百川萬派。同歸而不溢也。故馬援見世祖。歎天子自有真。故昭烈兵數敗。依曹。而曹目英雄。故漢高一亭長耳。縱觀秦皇帝。歎大丈夫當如是。蓋迺天授也。淮陰大將器耳。蓋漢終不能奪我齊。而所志畢矣。故終謝蒯通。夫天下有大勢。識所在而先之。而天下定矣。項失大勢。三秦關中資漢。令淮陰出空虛之地。舉趙魏燕齊而制其後。生彭越。擾梁之食。而項遂亡。蓋淮陰識二馬。項失三勢。不能有天下。而為人禽。淮陰識二。能有天下。而不有何也。器固不能及天下也。且蒯通嘗以天下之勢。教淮陰矣。兩利參分之說。特結信耳。故曰。因民之欲。西鄉。為民請命。天下風走而響應矣。夫西向請命。不鼓行入關。必出宛。集并漢可。

知也。此有天下大勢一也。而信不能大勢。又在垓下。當是時。淮陰將兵三十萬。兵漢將。惟曹興周勃王陵小雄。餘奴隸使耳。部分漢將。追羽掠地。誘致越布。潛師夜起。襲漢。信固已帝矣。此有天下大勢二也。而信又不能。此知信器固不能及天下也。夫知天下之材而用之。可以有天下。知天下材之器之所至。可以用天下。才取天下而不殺。漢高知用信矣。度天下無信對。已滅項。不勝惴惴。至欲殺信。此聞信器也。雖然。蓋不如季友配叔牙而後于魯。取蓋不如全卿門戶。故有此處分耶。夷其三族。漢真寡恩哉。為淮陰奈何。解兵柄。謝王爵。著道士服。棄家訪全真。不可則學范蠡行意。嗟乎。三代而下。君臣之間。固尚智詐哉。

說丞相宋如發蒙振落論

能不役志於利。則獨立不懼。犯顏撻辱。一旦有變。死衛社稷。難惑以非矣。變不必有也。而信其貞變者。則以能死練也。夫利害莫大于死生。不靳死以諱其君。庸新死于其非君乎。故志富貴者。謂之鄙夫。聖人以為不可與事君。史記汲黯傳曰。淮南謀反。計曰。說丞相宏如發蒙振落。夫宏以經術飾吏事。孟堅目為儒雅。盛漢得人。淮南何由說之。易易耶。此非情語也。史疑真矣。且夫南北背馳。始跬步耳。濟水東西。各以千里。原其始分。不能以咫尺。人于義利。亦若是矣。故曰。以此始者。以此終也。考史載宏不

面折庭中。公卿約議至前。輒倍之以順上旨。由是至左內史。元朔三年。諫罷開邊諸役。至朱買臣難宏十策。宏不得一謝。鄙人不知便若是。願專奉朔方。而是年封侯。夫罷朔方之諫。豈不須孰盡察哉。十不得一。順上旨。鉢于利耳。故汲黯曰。懷詐飾智。阿人主取容。韓固曰。曲學阿世。董相曰。從諛淮南曰。如發蒙振落。雖然。宏之順旨取容。有由然也。宏忤旨免官。時年六十矣。閱歲五。盛毀西南夷。又不見聽。日暮途遠。改弦更張。情矣乎哉。且漢武猜雄。憤不及族。蚡手持太阿。丞相備員。事不關決。劉屈氂公孫賀相次就誅。宏知之早矣。然自是兢兢無所著。功名之習成矣。丙避權勢。章治容容。王嘉少戇。然終得罪死。至匡張馬孔同傳。漢祚遂移。則皆宏以儒雅名臣為之倡也。然並宏世。兒寬和柔承意。無所匡諫矣。張湯以知陰陽。人主與俱上下矣。則又漢武猜雄累之也。盛王知其然也。故求執義堅確之臣。廣教化。美風俗。有事則守成。深堅。唐元宗反是。指宋璟為賣直。知李林甫嫉賢莫甚。而專任十九年。德宗播遷。猶思盧杞。蓋已不勝其四關五道之欲懼守義者。畜我不便我。而求側媚與同也。宏節儉。殲有榮稱。而淮南夷之陳希烈張垺而不可得辭。其君幸而漢武悔輪臺。不幸則唐元德二宗。世之驕主。能臣猶挾欲相奉以魚水。何哉。是以大臣必以道事君。君必兢兢自約于道。以無累其臣。

論蜀漢荊州之失

蜀漢不可為於荊州之失決矣。荊州之失非天也。昭烈忠武之謀兵疏也。天下知不及而不為者有矣。未有及而不為者也。謀不素而壞者有矣。未有素而壞者也。忠武之對隆中曰。天下有變。命一上將將荊州之軍。以向宛洛。將軍身率益州之衆。以向秦川。夫昭烈寄寓荊益。他人有耳。言不以夸哉。卒之公安立營。益州領牧。時且踰紀如握左券。不亦知與。亡何江陵見襲。吳定荊州。於是漢事去矣。雖然。余不異昭烈之不向秦川。而異其任荊州孤軍遠進也。何也。昭烈之勢固未能向秦川也。且昭烈即向秦川。而荊州亦敗。蓋時獨宜赴荊州耳。當日南郡麇芳。公安傅士仁。上庸劉封。孟達皆庸材也。潘濬亦面著牀席而已。即不北伐。猶孤沉密。邇強鄰空巢。遠攻耶。使昭烈引雄師。駐荊州。蒙雖譎如鬼。直坐廢耳。曹仁聞兵來益衆。勢當倍愴。諸受印號者。踰益來。操不遷都得乎。昔秦始皇授王翦兵六十萬伐楚。既殺項燕。又掃境內軍。自將益之。王猛破慕容評。圍其國都。符堅更將軍應猛何者。為後援也。孫權知之。故赤壁之役。命公瑾曰。卿與子敬程公。便在前發。孤當續發人衆。為卿後援。曹操亦知之。故令徐晃救仁。而自至摩陂。夫昭烈嘗引兵五萬下公安矣。為蒙肅之爭荊州也。當時蜀初定耳。亟亟赴之。矧荊州縣軍攻樊耶。且大軍圍樊。曹救必至。師老堅城。

後望無繼。即無權蒙之襲。兵勢亦以危矣。況荊州得志。權必不願。司馬懿將濟。且知之。漢中稱王。寘延督。治亭障。付荊州度外。不其疏哉。不其疏哉。或曰。當日羣臣上言曰。董孫六軍掃滅。凶逆昭烈。上言漢帝。亦曰。獎率六師。夫業已名之。勢固不得按兵束甲。敢大言而已。故揚兵示武。苟名薄伐。非果大舉如隆中素計。至七軍之濟。于禁之擒。固出所不料也。夫天下苟以為名。未有不實收其咎者也。積貯訓練。蹈瑕抵隙。侍之耳矣。何名之為。不名則不苟。不苟則動萬全。況兵威既震。敵人股栗。尤宜親赴荊州。還將掎角。分兵略地。收撫豪傑。乘勢席卷。安得坐失機宜。聽荊州孤軍徑進哉。故曰。荊州之失。非天也。

狂言

人萬有不齊。究性近而教可施。是以君子之于不善也。勢禁之。優容之。使畏懼而內愧於其心。其窮在下者。則不絕其前途。俾有冀而遷改焉。夫天不能羽毛鱗介必四靈。人必周公孔子。天之性也。君相裁成。在修道之教。而成天下不善之才。今夫川固未有壅而不潰者也。浸城郭。湯村落。浩浩盱眙。閭閻為河。知者知之。順其性。謹隄防而已。蛤繁蘆蒼。灌溉木黍。烏了迴翔。匪直不害也。故曰。小決使導。譬之馬。蹏者善走。留者善負。羈勒鞭朴。務馴伏調馴之耳。不必殺以享士也。故曰。馭惡人如是矣。不善

之才無定也。下者毋絕其衣食之源。中者毋絕其富貴之望。惟才大願深者。不能滿其望也。又不可缺其望。要不令之居內而已。易曰。外小人。泰哉。泰哉。向使韓侂冑得節鉞而去。偽學曷榮焉。張元吳昊得一幕佐。曩霄曷強焉。故明裁驛夫。自成借資。故曹參去齊。市獄為寄。四公子食客。六國無叛民。夫計畫無復之。輒斷脰穴胃以死者。非不善之才也。才之不善。又非奸人之雄也。固教之可備。驅策絕之能為小小禍端者也。且即萬萬無禍。亦遽殺泛駕之馬耳。棄才拂性。蓋甚哉。若去奸人之雄。固自有道。快根拔株。無與禍鄰。禍乃不存。又曰。需事之賊也。正不得援以比。夫大禹治水。龍蛇放之。漁虎豹。犀象。武周驅遠。況不善之才。僅等之鼠偷狗盜之小小哉。故用才者。務興賢才。尤務成不善之才。不善猶足用。吁。教之權蓋神。

海樵高君墓志銘

福鼎學訓導高君卒之次年春。其孤內閣中書澍然奔喪自京師。奉妣德孺人柩。與君合葬邑北鄉十九都許礫山原。先期以狀乞志銘於君同年友邵武府學教授吳賢湘。湘受狀。謹考其世德學行。著作科名官階年謚配與子孫而志之。遂以銘志曰。高世光澤縣。自太宗六傳。至例贈孺林郎諱鳳者。為君曾祖。太學生。貤贈文林郎晉奉直大夫諱仰辰者。為君祖。郡庠生。敕封文林郎諱組經者。為君父。封公位。

次早孤母龔孀居。復旌幼而能讓。感祖妣吳舍長就養諸姪多艱。公力護之。失在孤悲。延師教子。擇秀與偕。膳脯惟公。後先獲雋。光文始盛。君內外完好。尤義之敦。鄉試友卒。護觀舟行。聞捷不顧。卒與俱歸。同年卒官。既歸其喪。倡捐置產。經紀歷年。授孤於壯。福鼎貧士失試。削籍言於督學。皆之補試。其論學主宋儒。談經宗漢。受制藝詩法於瀘溪黃進士堂。受古文法於建寧朱太史仕瑋。著漢學起聞二十卷。鼓音初集一卷。古今文若干。由副榜貢生中式。乾隆丁酉科舉人。揀選知縣。丁未大挑二等。借補福鼎縣學訓導。例封文林郎。晉儒林郎。卒於嘉慶丁卯九月。年五十有九。及門士私謚文穆。先生配德孺人。繼張孺人。道黃氏。張氏子某某。孫某。德孺人先君二十一年卒。年二十九。孺人之歿。悲其舅璋乳嫗不家。願事終身。頌恩於歿。淚墮聲吞。久久不衰。人指為病。例贈孺人晉安人。以今戊辰之臘五日葬。君諱騰。字鶴年。初號九皋。晚易海樵。銘曰。

文不明堂。以耀膠庠。膠庠之光。斯文之傷。有道能文。昌黎於邇。曾足之云。中書最哉。垂文采。見諸行。宜播穫。譬之耕。

行儉論

陳斌

欲天下足食則勸耕。欲天下足用則行儉。勸耕之要。余有量行濟濟之說矣。若用絀而國不儉。則勞費日煩。未作日衆。人民之歸農者日少。將用不足而食益不足也。饑盜來之。遂不可支。然則天下長久之脈。在行儉而已矣。行儉之實。在止欲。在去飾。在禁糜。而不在於吝。出內。裁正費也。蓋出內吝。則無以使人。正費裁。則無以供事。此欲怨之由。而非謹身節用之實政也。今觀鄉鄙細人之欲。飽煖而已。羅衣糲食。一金之資。可以給一人。若進而求美好。則用倍之。進而求豐餘。則又倍之。又進而求鮮異。則更倍之矣。而所見巨商豪吏。一宴而必數緡。襲衣而必百貫。一衣食之費。平人且終歲而耗千金。而又欲美其宮室。飾其器用。侈其一切養生送死之具。而又有聲色之娛。狗馬畋遊戲玩之好。數倍於常用。吾以知人之欲。至無窮。而其害亦至無窮也。而況於卿士大夫之有家。而況於后王君公之有國。與天下者。其導欲非一人。其從欲非一事。起於至微至近之間。而漸至於屈四海之力。而憊然不覺。豈不可為寒心者耶。若一日止而絕之。以寬於民。以補於財用。則朝廷上下。即傳為盛德。不數年而天下咸為風俗。廣為教化。則公卿守法士大夫上廉。農民安處而盡其力。吾知任事之臣。不必為銖兩出入之計。而天下之用漸足矣。天下習俗之陋。莫甚於去實務尚虛。

美施施然惟粉飾之事。自知其力之既屈。而猶侈其外觀。則立敝之道也。故吾謂欲行儉者。又在去飾。夫飾非一端也。有罄其力而飾者。有力不足而愈飾者。罄其力而飾者。其室空。力不足而愈飾者。其業敗。美以明其然也。今有一日用之器。亦取用而足矣。而或飾以刻鏤。刻鏤不足。又飾以丹采矣。丹采不足。又飾以金玉矣。而凡服御飾於身。陳設飾於家。妾婢飾於內。僕從飾於門。鞍馬。輜舟。飾於路。非禮體所係。而必為是者。以為外觀之不可已耳。此猶罄其力而飾者。然出廣而入有數。富室必落中產必貧。若其已貧而勉循富者之為。無所入而不塞出者之資。牽庸人之議。以示觀美於俗目。而不顧其後。則日虛月耗。而不可救矣。聖人有言曰。有國有家者。不患貧而患不安。貧不可諱。儉則可安。後世患貧。而又不肯儉者。粉飾之言誤之也。況胥天下而尚粉飾。則人無誠樸之意。事無經久之計。其害至大。又不特儉之不能行也。至一切無名費用。即豪家大族。其房戶庖廚廐苑之閒。與夫節賞年例。寺觀香火之類。靡所不有。而況於有國家乎。故古今豐大之朝。事多用廣。費有所因。遂歷久不革。則且視為常款。沿為定額。曾不知其歲歲而虛糜也。濫賜之始。故為長流大壑之澤。竭於漏卮。故崇糜者。又行儉之一事也。或曰。人主患不廣大。度支出入。歲鉅萬。而惟儉之行。是示人以不廣大也。奈何。曰。人主謹身節用。以一人之儉。養給天下之眾。則正

廣大之至也。唐堯土簋而稱聖帝。夏禹冠衣而冠三王。李文以弋綈為漢太宗。憲宗以一肉興唐中葉。而於豐亨裕大之時。進惟王不會之說者。未有不誤人家國者也。故一人行儉。即為教化。天下行儉。即為風俗。儉則食用不侈。而物價平。技巧不作。而農力盡。由撙節之後。可以蕃生殖。由生殖之後。可以備積儲。有積儲而可以饋兵。可以禦荒。而天下之用恒足矣。夫豈纖悉之務哉。曰。國儉而不能舉禮。又奈何。曰。三代而上。布衣而朝。陶匏而祭。再進以儉。故不能舉禮。今之儉。猶古之奢。竊謂必行儉。而後可以求禮意也。漢明帝曰。吾子豈得與先帝子比。此為知國計者。若唐之嫁公主。宋之郊。明季之封藩。則自罷其國耳。何禮之舉。而又何儉之能行哉。

存恥

聖人有恥乎。曰。恥不似天地。恥一夫不受其賜。恥而後為聖人也。然則焉能諸。曰。愛孺子者。咳其名。置之於膝。則喜。俄而三呼三醜之。則號而求去。故生而恥者人也。無慮不能也。人不能於孺子罪也。不富貴利達。非其罪也。富貴徒有之。猶罪也。有且不能罪。且甚也。罪在己者。吾恥之。罪不在己者。冒求之。為招馬。吾益恥之。恥吾恥。所以謝恥也。不恥乎其他。故不為其他。乃惡其叢恥。蔡伯佈早而慧。五齡侍帝宮。伏背承檻而出。入太子童而亡。恥者也。馮道拜馬前。德光曰。何物老子。道應曰。癡頑老子。積

其亡恥以至於幾死者也。李斯之出倉中之鼠也。秦維翰之求達一尺之面也。鄭之南鄙葵有女而惡鄰有女而好。忘其好也。往足燕之結至。則澤無施焉。鄰女伏終身不窺中局。而葵女益厭彼數人者。葵之闖然中局者也。無怪其甚也。天下同羣而異行。君子行法。小人行媚。媚者遮蔭之人也。孔子曰。鄉愿。孟子曰。妾婦。漢曰。中庸。後世曰。圓通。其狀不可詰。或正容於其旁。而卒不可與莊語。不富貴利達不止也。有存恥者。則愚著之曰。恥如律。踰恥罪及恥如石。失恥身滅。學恥則益。宦恥則潔。女恥則節。有國家者提恥以治。大臣恥嘿。小臣恥賊。武臣恥逃。學校恥成文。道恥拾室。恥別童子恥為吏。百姓恥盜竊。世世長治。

世教隄防論

易詩書禮春秋世教之隄防也。故尊之曰經。通之者曰儒。作之者曰聖人。自羲皇堯舜三代諸聖人為後世深憂遠慮。行為道而傳為教。其後世卒不能無解散潰壞也。先師孔子亟起而修之。易以防患。詩以防邪。書以防誣。禮以防爭。春秋以防亂。其不治義黃堯舜以來之術者。皆曰異端。攻乎異端。斯為害也。故先師不言怪神。不為隱怪。所以正道教。完隄防也。先師之世。老墨膏腫興。其百數十年之間。其書沈伏不敢傳。其堅僻辨智之徒。名氏不敢稱。而橫議不敢發。蓋易詩書禮春秋之道。雖不行。恃

義黃克舜以來之舊防未敗也。嗚呼。至孟子時敗矣。至漢唐以後。又愈敗矣。由今觀
戰國之天下。其膠結不解。捍閭闔殺之事。此生民以來至烈之禍。而孟子談笑揮之。
曰。去利懷仁義。曰。不嗜殺人。雖不遽止。而其道易明也。至於辨楊墨之言。乃不啻抑
洪水驅猛獸之力。而惴惴焉。猶懼其不勝。漢受秦弊。至孝武窮兵多殺。天下將耗竭。
不救。董子進策。未及焉。而約其旨。曰。諸不在六藝之科。孔子之術者。勿使並進。惟深
恐方術鬼神之人。攘臂其間。韓文公興唐德順憲宗之代。內則強藩悍鎮。外則吐蕃回
紇。去南北朝六七十年之間。生人大患未息。然其建策抗節。尚無係唐之重輕。而所
謂濟天下之溺者。則在汲汲與其徒黜佛老。嗚呼。天下人心之變。悖仁賊義。而興殺
伐。殺伐既厭。乃輸情安情。安之久。乃尚奇衰。奇衰之傑。乃倡空無。故空無者。情安之
宗。奇衰者。殺伐之召也。自先師二千餘年之隄防。一不修而決於楊墨。再不修而決
於佛老。孟子命世亞聖之才。黜楊墨而楊墨之道息。漢唐以下。儒者力愈弱。變愈亟
矣。雖著筆奮舌以救之。而六季之濁亂。五代之潰爛。卒乘其後。而有不忍言者。苟隄
防未壞。亦安有至此極哉。嗚呼。有聖人作。先仁義教化以正風俗。固人心。則彼役佛
老者。吾民也。講佛老者。吾士也。援而出之。復其職業。此至急至切之務。乃唐宋賢明
之君。一不許創立寺觀。一沙汰僧尼道士。終未見拔本塞源。旋去旋盛。陷溺愈衆。而

國朝文匯

卷五十九

十七

國學扶輪社印

莫如之何。此諸儒卒以困而無所救也。且西漢初尚黃老。其既也。儒術為盛。明帝立佛祠。使其徒桑門習之。士民猶未變其俗也。至唐宰相請度為桑門侍從。教度為道士。遂以為修煉之術。福利之數。宋以後吾儒之談性命者。且援而入之。是時老微而佛盛。徒侶益多。故釋子之書。微者析毫毛。高者駕太虛。若傅奕韓愈二程朱子之著論。非不切至而開明也。而黜其無人理。聚黨惑眾。為國家靈害。則有倚其心性宗旨為說者。黜其心性宗旨。近理亂真之誣妄。則更有以大賢老儒之所棲託為解者。嗚呼。今使服其教者。朝而梵誦。暮而悟徹。必不能也。今使用其法者。生則乞食。死則火屍。亦必不能也。夫既不能。奈何背畔先師。廢棄職業。不憚決歷世之大防。而尊為內典。引為本分乎哉。夫自開闢有人類。即有桑門。其並生不害者。天地之大也。中土聖人之治。有窮山邃谷。非吾民耒耜所刺。使彼中枯槁之徒。逸老息死於其地者。帝王之大也。若慮及無食之奸民。不教之丁壯。小惑大譁。託佛會以鼓愚眾。紛紛而不可戢絕者。此正今日士大夫所宜寒心。而不可不亟反者也。乃或昧反經行法之旨。而復哺糟啜醢於六季之餘。則一穴之細。可以潰隄。一夫之狂。可以壞俗。不能亟反而復扇之者。其不為世教之罪人與。故吾謂行義黃堯舜以來之法。必不可亂以彼法。從易詩書禮春秋之教。必不可亂以彼教。師孔孟程朱修道立教之言。必不可亂

以彼言。孔孟程朱。即千百年一生。而世教必不可不正。濁亂潰爛之禍。即千萬年不復見。而隄防必不可不修。嗚呼。是儒者之責也。是吾儒負天下望者之責也。

論秦弱

天下之亂。乘於弱。秦未嘗弱也。何乘之者卒耶。曰。有形有情。天下之形弱者五。其實弱者三。上不斷也。下不陳力也。軍無食也。郡縣罷。藩籬破也。是謂形弱。形弱者有為。則必敗。有忍。可不亡。懼之十年。謀之十年。抱本固末。其弱乃復。然而秦故無此也。則以何致亡。曰。主孤立必亡。法壞必亡。勢一去不可集必亡。三亡徵者。乃為實弱。實弱則易乘。君長者。非獨能為之也。臣民之眾之推而主焉者也。故邑所眾主長一邑。國所眾主長一國。天下所眾主君天下。始皇有國二十六年。三十戰勝而并天下。謂藉自惠文昭襄六七世之詐力。以躋斯位。而非由天下之推而主之也。不勝其疑近忌。遠下夷滅制。以塵掃湯維六國之人民。至數十百萬而不宥已。窮富窮貴。自聖自智。不欲聞忠臣諫士之一言。外若郡守令。內若丞相博士。欲手重足。避罪譴。無敢比於僕隸。而惟蓄其景響之李斯。狗彘之趙高。以斷決於天下之上。譬作巨室。址無砥環。無垣覆無陶瓦。大槩隆棟孤撐露立。則高而益危。壯而益摧。夫欲伏一人者。必有十人之助。伏十人者。必有百人之助。始皇欲盡伏天下。而不知助之者之為誰。此匹夫

之挾厚資而舍於行劫之家者也。此孤立之弱也。昔者商君用秦權一切富強之謀而刑為秦法。裂阡陌以予民家。二人者一人戰一人耕。吏休任力。業本而簡務。必賞罰而示民向。秦守之累世。遂屈六雄。至於始皇。執法盡變。重罰不寬。觸網者至無目之麗。徵天下富室巧技以廢民耕戰之業。而積其姦富以相壓。文書煩促。上制之趙高。雜治之下。之有司。刀筆之吏。又相率為奸欺。致朝廷之上。窮日夜而不可詰。誅治獄吏千萬人而卒無所儆。沙邱之賊。索十日不得。蘭池之盜。索二十日不得。秦尚有法哉。故商君壞聖人之法。始皇壞商君之法。有司壞始皇之法。法大壞。國非其國也。自始皇二十八年。蒙恬將三十萬衆。暴露北邊。雖咸陽之重。不復置信。臣精卒斬山夷谷。堙天地之險阻。通直道於九原雲陽。而大開殺函關隴之門戶。秦之地勢去矣。得荆齊地至遼遠。亦不為諸子置王填之。吏不遣重臣蒞其要害。五六十里之外。事決於使者。守令救死不暇。無威重可折子弟之亂萌。而天下之大勢去矣。邊卒老而弱。京師露而弱。郡縣散而弱。不深居簡出以備天下之圖已。而敝敝以求方鬼。天下益輕量之。乃復驅其丁壯罪隸北向而塞。南向而募。西向而宮殿。彼陳勝吳廣劉項田儋之徒。其何忌而不反哉。當此之時。李由守三川。弗能禁。章邯發近縣兵。弗能及。刑徒戍卒。碎大成如蝦卵。而函關之三百年。無敢問其下者。不踰旬日而沛公一

軍軍霸上。嗚呼。主孤矣。法壞矣。勢去矣。及始皇之身。備三必亡之道。而日暴至強之形。以愚其黔首。而以死迫之。天下本無所避死。何怪其率不知畏死之人。以致其死命。而毒秦哉。故匹夫積弱致強。秦積強致弱。是實弱也。自秦以後。實弱者。隋。形弱者。宋。不早圖其農桑軍政。以仁義實天下之腹。而幸其弱之萬一不亡。此在民悍鄰。所以急起而乘之也。此萬世之鑒也。

僧如鵬傳

如鵬不知其何處僧。宋先生大樽遇之。天台則以為台山僧矣。舊傳台山中虎不噬生肉。麋鹿見人不驚。古以為佛國。豈真有然者耶。諸老僧多葺茅居之。狀甚臞。問其年。搖首不答。與之金帛。無受者。是既可怪。今聞如鵬。偉然七尺。軀目如巨星。語纒纒喉舌。如古吐今。何為而亦於是邪。且言入其茅。不設門戶。聞其吟聲。石裂而谷響。紙稿投大鐵甕。人鮮得見之。今天下僧寺。天台方廣尤多。度前代大藏佛書。如鵬借之。觀期月。以徧茅中。無食具。日或飲一甌水。盡一溢米。或數日否。其貌益壯悍。嗚呼。豈不更怪矣哉。宋先生卒。慨然言曰。天台如鵬。萬古一瞬。其何有於余。余獨歎石梁瓊臺華頂之間。非如鵬不奇。而前後往遊者。百十輩。不能一遇。若余則既遇之矣。

陳子曰。物之精者靈。靈者奇。惟人亦然。然既近怪異。不可狎。天下有道。則滅蹟於深。

山大谷人偶一見之。彼如鵬者。其何為者邪。抑彼教之豪傑者邪。

姚烈婦金氏傳

杭有民家女金氏。昏十五月而遂以烈死。其同里孝廉方正邵右菴先生白之當道。為題烈婦主人節孝祠。布衣陳先生燦書其事。以告德清陳斌。請為之傳。傳曰。烈婦金女也。父秉中。以許姚氏子之季。曰聖天者。錢唐郭北同里閨人也。及秉中沒。乃依其兄移居仁和之打鐵關。而壻於是時適瘵疾。且以兩家貧。各不能舉禮。故女之侍嫁。及二十年。金族人嗾其母。令絕壻者數矣。女拒以父命。謂不歸姚氏。吾無死處也。歲既久。先時媒妁無在者。其從兄裕堂再三趣姚戚曰。妹壻病朝露。吾妹之志。即昏成婦。旦稱未亡。得逮事老姑。不怨也。殺禮舉之。何忌。婦遂以嘉慶二年二月十八日歸于姚。姚氏子曰統天。應天者。婦兄公也。先喪偶。無鞠子。以弟聖天病廢久。故亦不願其昏事。比婦入門。頗以女功佐助醫藥。聖天得少延矣。三年八月病又劇。乃吞聲私語婦曰。汝何歸哉。汝何歸哉。吾終且負汝。汝能學他家節婦。吾死姑益老。奈吾家獨居者何。婦益心痛。借他言聞之。遂數日出入不言語。至其月晦日之夕。坐視聖天呻吟。俟盡。婦閉目不忍視。伺聖天聲息竟闕。戶結衣。襟服酒死。聖天起而慟。且以掌擊牀木者再。曰。吾有婦矣。繼亦死。

論曰烈婦先其夫死里中唵唵謂婦愚事不合旌典斌則未敢竊議若其昏年婦已三十三聖天三十五矣大義幾虛絕婦卒歸以死殉暇日不欺若婦者其亦有以自斷者矣

人才論上

張澍

何古之人之才多也。遺之大而不懼。投之艱而能堪。其恢恢乎游刃有餘。綽綽乎展足不蹶。是豈鹵莽以將事。倣倖以成功哉。自其始不移於物。不滑其真。凡兵農禮樂工虞水火。無不旭厯銳銀以求造乎其精。而又養之以三物六行。以固其根本。是其所學者正。而其德裕也。學正則不為縱橫。裨闔之術。德裕則不為容悅。隱諛之行。當其伏處衡茅。不求聞達。粥粥若無能者。一旦膺徵聘而出。典章若素。諳政事若熟。諳舉而措之。有旋乾轉坤之力。而無雷振風動之迹。天下宴然如委裘也。即或時事艱虞。外患兵戎。內變肘腋。羣疑滿腹。首施兩端。而獨不動聲色。鎮靜如常。摧彊寇于談笑。消讒謗于無形。宗社苞桑。茅櫨鳬藻。若是者。得不謂之才乎哉。然其人固未嘗以才自銜也。小心敬慎。鞠躬盡瘁。曰吾以奉吾職耳。後之人歎羨而愛慕之。以為才之兼於人也。烏知其學之者為何事。德之積於厥躬者。一發而攸往咸利。非臨事周章以襲取之者乎。

人才論下

今之人豈遂無其才哉。然今人之所謂才。大抵皆古人所謂不才者也。以清勦釣名譽。以接納獵爵位。既而以容默固巢窟。久之則兇詐鉗忌。以箱人口。泄泄然冀承平。

國朝文匯

卷五十九

三

國學扶輪社印

之久享也。遑遑然惟貨利之是殖也。他人之以才見者。不惟不藻厲之。則曰是喜事。是貪功。必抑塞之。而後已。是乃今人之才也。或曰。今之膺大名登臚仕者。詎非才乎哉。余曰。是則然矣。余嘗見其設施矣。朝出一令曰。某書院缺膏火。各府縣其捐之以作士。莫出一令曰。某地有盜賊。其添兵數名以防守。究之未嘗造一士。祇以數金月費糜之也。究之未嘗獲一渠。地方之報劫者。置罔聞也。凡若此者何也。曰。吾以盡吾職耳。偶有水旱。不思撫綏之道。則曰。此天災也。今之民不良甚矣。安可無天災以懲創之。其理刑名也。務欲脫凶人之罪。曰。死者長已矣。生者吾脫之。可以廣陰德。其取人也。以奔走為勤幹。以夤緣為曉事。以饒餉為得體。圓必如彈丸。柔必如韆斃。而中才以下之人。從風而靡。皆潰爛於其中。而莫之返。稍有克自樹立。見頭角者。則挫折之。困辱之。甚且假事而罷斥之。於是世乃無一才。非無才也。陰柔之氣。繚結既深。則生為蟲。蟲虺蛇狐狸。種育既繁。相與噬齧。不至於滋害萬物而不已。孔子曰。吾未見剛者。剛陽也。天地日月山川。非剛不立。知乎此。而可以得才矣。

書王貞女事

夫滄海至深也。有時而枯。介石至堅也。有時而爛。日月有時而闕蝕。陵谷有時而變遷。獨此懿德之根於性生者。不以富貴喪。不以貧賤奪。不以時危而渝。不以力孤而

誣此乃天之所為。非人之所為也。今於王貞女事信之。貞女者。富平縣西鄉民王生輝之女也。家貧甚。幼字科子邨溫振邦之孫繩武。溫亦貧甚。有妻高氏。年俱七十餘。子早歿。止繩武一孫。年十八。為人傭作苦。未能親迎也。嘉慶二十三年十二月二十六日。繩武病歿。女聞之。欲奔喪。其父阻之。女堅欲往。強阻之。既而念己貧。溫姓子單謀以女適他人。女知之。悵痛潛詢溫氏之居。阻何許。徑路何嚮。於二十四年。乘閒奔赴溫氏宅。痛哭匭前。極哀畢。即拜見祖舅姑。言已終身奉養祖舅姑。決不顧他適。意振邦夫婦曰。我家貧。身且老。旦莫謝人世。無所依賴。恐誤汝終身。汝其往汝家。貞女則泣曰。兒甘心食貧。堅守志節。若有變改。死不赦辜。溫氏夫婦方旁皇無可奈何。會其父蹤跡至。呼女返。女堅不肯。其父強欲挽回。貞女望井投墮。鄰里觀者。咸感咽良久。勸其父從女志。勿彊也。其父乃從。是時女年纔十三歲矣。嗟夫。士大夫束髮讀書。奮義談名節。儼然義概秋霜。氣陵蛟日。視召忽猶棄。喚呼申劓為堅子。一旦值時机。墮首施兩端。或且奴顏婢膝。北面仇讐。反笑碎首之為愚。欣富貴之自在。此與狗彘奚異。或曰。貞女之行。固觸然不滓矣。然未嘗合卺。是夫而未匹也。則不可以守志。未經廟見。是未謁舅姑也。則不得成婦。而遽以身歸。自比於未亡人。毋乃違先王之禮。而益於經乎。余曰。此至性至情之所發。即天經地義所由立也。昔王蠋未擔齊主而

死於燕師。魯仲連固布衣而不肯帝秦。當時稱為義士。未聞有訾毀之者。貞女之束身溫氏。誓不他嫁。即此志矣。如若所云。則漆室女真有欲耦之心。則蓋感風俗。非維持名教者所宜出此言也。憶明洪武初。諸暨孟氏女。為同邑蔣文旭所聘。文旭年十七。官監察御史。請歸親迎。值條奏時事十二款。忤旨賜死。孟氏哭告父。謂文旭既親迎。有吉日。禮宜往弔。不許。又謂文旭死。其父母無子。請往事姑舅。又不許。乃瞞匿過門。躍出隨之。俟舅姑亡。仍歸家築一樓以居。名曰柏樓。宣德中。徂之。即我朝康熙時。仁和計二姑。許同里陳桓為妻。桓以貧從軍於閩海。身沒於陳。二姑過桓家。親為操作。且絡絲餉錫。日取傭值以養桓。二親逮老死。當事以事上之。廷議亦予旌。何嘗非時王之制乎。曾子問曰。取女有吉日而女死。如之何。孔子曰。壻齊衰而弔。既葬而除之。夫死亦然。言夫死亦然者。明夫死而女得服斬衰以弔也。則固未散先王之典也。今貞女來溫氏三年矣。勤鍼黹以事祖姑舅。備極劬辛。靡有懈怠。閨處閑室。非至戚不與相見。其貞亮之性。有特異者。獨其家計過窘。楚楚一女。奉晨夕膳。實亦維艱。世豈乏仁人君子。慨施泉布而為之置田。俾得贍白頭二老。以終其身。貞女亦得稍蘇息。無枵腹之虞。豈成節義扶持綱常者乎。余拭目俟之。

先生氏劉名作垣字星五武威縣人乾隆丙子舉人辛巳進士宰安徽舒城縣縣當通衢有司日急供張多不暇謀民事先生性果決善折獄有訟牒攝兩造至不問所訟事先以道理開喻再三然後訊釁端靡不輸情悅服最惡侮張堅不吐實者痛懲之久之民知官之廉平而明敏也則相稱曰劉頗黎遷泗州知州以獻鄰縣獄徒吏議歸閔撫軍鶚元嘗謂屬吏曰身入仕塗不脫書生本面目有劉泗州一人而已方先生未赴選也嘗掌教酒泉書院愍學侶困于時執不知稽古乃量材質高下日課經籍數十條昕夕講貫弟子交相激發多傳通梓雅之士科目蔚興洎罷職返里酒泉人復延之人文踰于曩昔旋主講天梯書院嚴立課程不與以暇生止語默繩以禮法稍踰閑呵責立至學者莫不冰襟為文恪遵先正矩矱以理醇辭雅為的謝年方稚從之受業先生奇愛之病其筆端縱橫常曰子才信佳而文執法度非時執也會學使章桐門先生將按臨先生謂謝曰子熟文選亦諳律賦乎謝對曰未先生曰子急取律賦讀之學使至可考古也謝乃取家所有新賦湧雲全部讀之六日而熟請先生命題作之先生賞其藻麗復嘗其奔放已而學使至涼謝以幼童與試名列第二先生喜甚謂謝曰子毋謂賦佳而被甄拔也學使憐爾幼故提獎之耳謝於是益奮厲遂成進士為庶常改知縣令黔中玉屏先生寓書曰古人之牧民也官府若

無吏亭落若無民。鄉閭無夜召之征。郵驛無夜行之吏。犬不夜吠。鳥不夜鳴者。以其不擾民也。余不患子之慵。不事事。而慮子之勤而多事也。先生治尚綜覈。而其言乃如此。謝履之曰。令煩則民詐。政擾則民疑。不治本而務其末。譬如拊溺而垂之以石。救火而投之以薪也。淮南子云。小人之治民。如寢關曝曬。不得須臾寧。謝不敢出此也。即子美之烈火。安子之峭澗。謝亦審時量地。不敢妄學也。迨謝自蜀屏山歸。而先生歿矣。年八十有二。謝後南遊。遇舒城老宿。言先生初宰舒城。有兄弟爭產訟者。各以財賂之。受其財。不之理。賂踵至。仍不理。兄弟又多其金賂之。先生乃坐堂皇。出其賂。呼其人至而呵之曰。爾兄弟爭產。是愛財也。何為以財賂官。得毋以財求勝乎。然何能兩直也。爾祖爾父。銖積以有此。乃以飽官之橐囊。愚孰甚焉。呼伍伯將杖之。兄弟則叩頭哀乞。願不終訟。合財如故。先生乃令兄弟均分其金。各悔辜。揮淚去。嗚呼。此亦令世之所難矣。所著有周禮滙解。左傳闡義二書。大抵米宋儒之說。而參以本朝諸家。于方靈皋尤為服膺。其言平實堅確。不尚新奇。可傳也。子學海庠生。孫瀛亦庠生。皆克世其家風矣。

何梅生小傳

君名承先。字梅生。與吾為同縣人。父天民。乾隆乙酉拔貢生。績學敦行。卒後數月。君

始生育於舅氏林明經起鵬家。君性幼而夷曠。邈然高厲。嗜讀書。熟於注疏。尤精綜史漢。凡鄭賈之說。顏李之注。皆言之鑿鑿。如以弗貴。肉乾隆乙卯鄉試。經題為詩小戎首章之前六句。典試者苦不得佳構。從落卷中蒐獲君文。考据獨詳。數激賞之。視所為四書制義。皆超逸非俗手所辦。乃拔列第一。為解元。時典試者湖南羅翰林修源也。得君喜甚。延譽公卿間。而其名日起。嘉慶乙丑成進士。改庶吉士。戊辰散館。授知縣。官福建長泰。君于事御之以簡。時或登山臨水。賦詩自娛。而尤湛於酒。庚午冬調南安。未抵任而病。病良久。遂卒。無子。君之繼室黃氏。載其柩航海至都。由都返涼州。葬時予在蜀。聞君之卒也。哭曰。梅生其死於酒乎。君與予交最密。年長於予。兄事之。顧畏予。能聽予言。猶憶君為庶常時。余適赴選。至京。見君面省瘡。患痔。銜尻水淋漓。透衣褥。余曰。君病如此。尚事杯罍乎。必痛絕之。君笑曰。速絕之。不能。請以漸而絕之。可乎。余曰。聽吾約。早飲必禁。哺食則數巡。能之乎。則笑曰。如約。一日午熱。君方卧。余異其腹彭亨。捫之冷如冰。堅如石。大驚曰。何乃如是。君笑曰。此病甚佳。厥名古賁。何幸而有此也。余曰。古賁牡蠣也。君腹豈孕牡蠣乎。此當溼之所結。久則必潰。潰則駢列。君何幸之有。君乃喟曰。有是哉。既而瘕漸輟。痔亦稍愈。則謝余曰。此禁酒之效也。今而後當嚴守約。君性既疏曠。凡錢財一委之家人。乾沒置不問。故篋囊常匱。

國朝文匯

卷五十九

二十四

國朝扶輪社印

會子以選滯欲南游。君亦請假返里。偕出都門。至衛輝而別。從此成永訣矣。距君歿之九年。余入都補官。或言君為江南廬江縣。顧應侯云。先是繼君任者白鳳。有神降其署。畫字槃沙中。為詞一闕。署梅生。眾謹曰。梅生先生來也。先生喜飲。曷飲乎。則又書曰。子為廬江城隍神。將之某處。鞠索勿勿不暇飲。然從人多。諸君其飲食之。梅生內弟林大本。適與其間。為人言之如此。林質厚。非造作事端者。噫。異矣。